




Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3398/A





Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3398/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3398/A



Early European Books, Copyright © 2012 ProQuest LLC.
Images reproduced by courtesy of The Wellcome Trust, London.
3398/A


3398/A
A. xxix 3623 3624


Macoma etc. = winter
of the 2nd & 3rd books in this vol.


L'Ant. Ancien
Lugano
905 for
April 28


34
134


T. 40 leaves
II. 24 " last blank.
III. 24 "














R 121097^a

3 works

INCERTI AVTHORIS

BREVIS ELVCVBRATIO


NVPER INVENTA,

DE HIS MORBIS, A' QVIBVS

HVMANA CORPORA INFE=

STARI, CORRVMPIQVE

SOLITA SVNT.



CVM PRIVILEGIO.



VENETIIS APVD GABRIELEM
IOLITVM DE FERRARIIS ET
FRATRES M D LIII.



D. CLAVDIO MARESCO-
TO ET ILLVSTRI PIETATE,
ET DOCTRINA VIRO AC DIVI
BARTHOLOMÆI APVD RHOD-
DIGINOS ABBATE
DIGNISSIMO.



VPERIORE Anno cum
Mediolani essem ; eumq; Vr-
bis locum frequens inuiserem,
in quem defferri solent , qui
ægotantes coguntur alienis
opibus suos casus sustentare ;
incidi in multos , qui Apople-
ctici , Auriginosi , Anorectici , Dissentericiq; essent ;
multos etiam uidi Tettanicos , Vternosos , Verruco-
sos , Lyentericos , & Polyposos ; ingemui ego tum du-
ram. Mortalium conditionem ; nihilq; homine fragilius,
& calamitosius esse mecum ipse iudicans , lustrare capi
ea loca paulo etiam diligentius : uixq; duobus aut tri-
bus spacijs factis , offendo mox nonnullos grauiter la-
borantes Mentagra , Podagra ; Impetigine . Glaucoma-
te , Lepra , Hidropi , & Porrigine . Forte fortuna il-
lic aderat Medicus homo Transalpinus (quantum ex oris
habitu , ac pronuntiatione dispicere potui) qui cum mihi

A ij

uifus eſſet nec inſuſus, nec indoctus, capi illum de uno-
quoque morbo curioſe, ut ſoleo, percunctari. ad quæ cum
(meo quidem iudicio) non inepte reſpondiſſet, domum
reuerſus exiſtimaui non alienum me facturum ſi quæ ego
curioſe rogaviſſem; ille uerò acute reſpondiſſet, cartis
mandaviſſem; non quòd eiufmodi eſſe uiderentur, ut me-
dicinæ ſtudioſos multum poſſent adiuuare (nullam enim
habent Methodum) ſed ut hoc nouo ſcribendi genere
iuuentutem ad medicinæ ſtudia paulatim allicerem, diſce-
rentq; adoleſcentes qui nam hi morbi eſſent, de quibus
apud Poetas tam crebro mentio fieret: adieci poſtea
nonnulla alia ſcitu non indigna, quo ſtilum exercerem
omnemq; ſermonem breui Medicinæ Encomio concluſi:
hunc tibi, tuoq; nomini libenti animo dono do; dicoq;
fruere tu hiſce paruis laboribus unà cum tuo Mario
Mattafillano Iuene pererudito, ſi quid ocij naſtus eris
ab illis grauioribus negotijs quibus iam multos annos
diſtineri conſueuiſti. Vale; & me, quod facis, ama.

3

INCERTI AVTHORIS

BREVIS ELVCVBATIO

NVPER INVENTA,

DE HIS MORBIS, A QVIBVS

HVMANA CORPORA INFE-

STARI; CORRVMPIQVE

SOLITA SVNT.



DE APOSTEMATE.

Hortensius, & Marullus Medicus.

H.



VID est (obsecro) Doctissime Marulle, morbus ille, quem vos medici Græco uocabulo APOSTEMA appellatis? M. Est ille quidem si forte nescis, carnis, uenæ, arteriæ, musculiq; interitus; & (ut ita dixerim) corruptio quædam, quod sanè APOSTEMA ipso initio rubro colore uisitur; & prædurum sentitur, uerùm cum paulatim maturuerit, multam eijcit saniem. H. Ita profectò esse credo. atqui postquam tam belle ab ste mihi satisfactum uideo; pergas (uelim) de reliquis morbis pari breuitate

A iij

mecum agere ; nihil enim iocundius , hoc præsertim tempore afferri mihi potest : Sum enim satis (ut uides) ociosus .

DE ATROPHIA.

- H. Quid parit, efficit'ue ATROPHIA? M. Solet hic morbus, maciem quàm plurimam coaceruare, & aggregare, obstareq; ne corpus nutriatur. sed quid enim maciem non facile contraheret; multa cum decedant; nihilq; quod opportunum sit, enascatur?
H. Cauebo mihi igitur ne talis obrepat morbus.
M. Recte feceris, si diligenter caueris; ego ipse quoque caueo (quoad fieri poterit) ne aliquando in Atrophiam incidam.

DE ACROCORDONE.

- H. Quid esse putas ACROCORDONA? M. dixerrim ego; Vlcus esse uerrucis simile; coit enim tum sub ipsa cute nescio quid asperum, et ualde durum.
H. Dij talem auertite pestem. M. optime precaris mi Hortensi; & ego quoque ne mihi tam dura accidat ægritudo non solum diligenter prospiciam; sed Deos, Deasq; omnes comprecari nullo unquam tempore non desinam.

DE ANOREXIA.

- H. Quid est ANOREXIA? M. est morbus; quo affecti qui sunt, Cibos aspernantur: pelli tamen solet is morbus, si acetum, resq; acutas male affectus olfecerit. H. Ita futurum suspicor: experimento itaq; si contingat aliquando, et comprobabo. perge tu modo alia morborum genera diffinire: nihil enim auidius expeto.

DE ANCVRISMATE.

H. Quid tu suspicaris esse ANCVRISMA? M. Nihil aliud est Ancurisma; quàm tumor quidam præcluserum arteriarum. H. Vnde nam trahit suam originem praua hæc affectio? M. E sanguine, ipsoq; spiritu simul iuncto; sed ad alia cursim pergas, si quid est quod scire optes. H. Multa mehercule in mentem ueniunt, quæ nullo modo ignorata uelim: sed metuo ne tibi nimis molestus sim.

DE AMPHIMERINOME.

H. Quid est AMPHIMERINON? M. quid obsecro aliud, nisi febris quotidiana ex corruptis humoribus, imprimisq; ex pituita coalescens? H. Sic profectò, & ego semper suspicatus sum, quanquã in hisce uestris medicinæ studijs nunquam uel rarò me exercuerim.

DE ARGEMATE.

H. Quid est ARGEMA? M. Prisci dixere Medici, Argema esse cum oculorum circulus afficitur ab ulcere. Hunc alij Irim, alij uerò Glaucoma appellarunt. Latini Albuginem dixere: fitq; quando ex pusilla plaga præfactis uenis, sanguis toti suffunditur oculo; paulatimq; niger efficitur.

DE APOPHOTOSI.

H. Quid est APOPHOTOSIS? M. Magnus est palpebrarum pruritus, piliq; tum ubertim defluunt: Palpebrarum etiam hæc solent esse uitia, nempe Diabrosis, Distochiasis, & Phtiriasis. H. Huiusquàm misera est mortalium conditio, postquam ipsæ quoq; palpebræ, humani corporis tam pusilla pars, tam miseris afficiuntur modis.

A iiij

DE ALBVGINE.

H. Quid est ALBVGOS? M. Est macula in oculo à colore subalbo sic dicta & ex glutinosa pituita emanans. Plinius, cum de re quadam mentionem faceret, in qua uirtutis plurimum esset, sic inquit, HAC ALLIGATA, OCULI ALBVGINES MOX TOLLUNTUR.

DE ANGINA.

H. Dic(queso)etiam aliquid de ANGINA. M. Dicā, hunc morbum inter acutissimos antiquiores recensere. Hæc. n. fauces occupat; strangulatq; multi Tonsillas appellarunt; at ab Hippocrate simul et à Galeno Synanche dicitur, Etymo ab ango uerbo deducto; quod hominem maxime angat, & afflicti. Plautus huius morbi uim sic explicuit. VELLE ME IN ANGINAM VERTI, UT HVIC ANICVLAE FAVCES PRAEOCVPAREM. Si quis tibi in futurum occurrat, quem Angina corripuerit; memineris nullum esse morbum, qui tam præceps requirat auxiliū; itaq; statim cubiti exteriorem Venam ab eodem latere pertundes; tegesq; collum, lana oleo calido inspersa. Fit uero Angina cum nec tumor, nec ullus rubor existit; sed tamen arescit corpus; uixq; spiritus attrahitur. Aretheus prestanti ingenio medicus tradidit hoc morbi genus, ex algore, algidaq; potione creari solitum: Anginae autem tria existere genera; nempe Synanchen, Cynanchen, & Parasyanchen. Testatur Iulius Mædestinus (si uera Macrobius refert) Angeronæ Deæ olim pie admodum sacrificatum fuisse, quod Popu-

panh. 4.
hi 3. inf.
27.

5

lus Romanus isto morbo grauius afflicto, factis
solenniter uotis liberatus fuerit.

DE ARTHITRIDE.

H. Quid est ARTHRITIS? M. Non aliud est, quam
articulorum praua quædam affectio: uti, Pleu-
ritis est costarum, & Nephritis solet esse Renum.
Hoc morbo grauius confectum ferunt Carolum
Pannoniæ Regem, uirum multis modis illustrem &
preclarum.

DE ALOPECIA.

H. Quid (amabo) est ALOPECIA? M. Est morbus na-
sci solitus in capite humano, quiq; ex uitiosis humo-
ribus prouenit; ab ipsa uulpe sic appellatus, quam
Græci Alopeca uocant: Crebro enim hoc morbo
uulpes afficitur. Docet Plinius quo pacto emen-
dari queat tam foeda ægrotudo, nempe radice qua-
dam ambusta tritaq; , cuti imposita.

DE AVRIGINE.

H. Qui morbus est AVRIGO? M. Est is morbus
quem multi Regium appellarunt, ab auri colore no-
men trahens; quæ bilis per uniuersum corpus effusa
perbelle repræsentat: qui isto laborant morbo, Au-
riginosi uocantur ab ijs, qui nunc latine loquuntur.

DE ARQUATO.

H. Vnde nam dictus est morbus ARQUATUS? M. à
colorum uarietate, qui in cælesti arcu uisuntur, sic
appellatus est; hos enim præclare solet affectuum
facies reddere. Traditum est à Plinio Arquatum,
Ictericum, & Regium eundem planè morbum es-
se; & Ictericum fuisse ab icterone aut sic dictum,

nos Galgulum appellamus. Huius morbi uim Lucretius Poeta insignis diuinitus (meo quidem iudicio) expressit.

DE ALPHONE.

H. Quid ALPHON? M. Qualis hic morbus sit, fateor me nescire; hoc tamen certò scio esse quendam morbum, quo, (ut Plutarchus refert) quamuis Atossa Artaxerxis filia grauer correpta esset nihilominus pater illam matrimonio sibi iunxit, caramq; semper habuit.

DE APOPLEXI.

H. Quem dixere morbum APOPLEXIM? M. Veteres repentinam consternationem esse crediderunt; & eo morbo laborantes, apopleticos uocarunt. Si hæc tantum in aliqua corporis parte accidat, Hemiplagiam uocabis. Latini appellarunt hunc morbum stuporem. Scriptum est à Galeno; in eiusmodi morbo, totum corpus, cum sensu, tum motu priuari; tantumq; superesse anhelitum, qui si tamen cohibeatur, maxima profectò periculiq; plena fieret Apoplexis: accidit etiam hic morbus ictu fulminis; interdum alia causa solet contingere. Patientibus autem exhibeatur mollis uictus, & qui facile distribui possit: affiganturq; cucurbitulæ Hippocondrijs, & irrigetur caput oleo rutaceo.

DE AMAVROSI.

H. Qualis ægritudo est AMAVROSIS? M. Est ægritudo oculorum aciem maxime lædens, incolumi tamen saluaq; pupilla, pauxillumq; doloris inferre consuevit ijs, qui sic affecti sunt.

DE APHTIS.

H. Quid morbi censes esse APHTAS? M. Censent Antiquiores Medici esse ea ulcera, quæ oris superficiem maxime lædunt: quæ nunc albæ, nunc subrubræ conspiciuntur, habentq; igneæ caliditatis quàm plurimum. H. Est ne is morbus, quem Barbari Alcolam nominant? M. Sic puto. H. qui uerò solent huic morbo maxime obnoxij esse? M. Infantes lætentesq; pueri, idq; accidit si nutricis lac uitiosum fuerit; aut infans lac ipsum non bene concoxerit. Memini me id morbi etiã uidisse in ijs hominibus, qui prouectiore ætate essent. M. Fieri fortasse potest ob uitiosos humores ad os diffuentes. H. qua ratione curari possunt infantes? M. Si moderate adstringentia exhibeantur; adultos uerò uenæ humeralis sectione facile curaueris.

DE ASTHMATE.

H. Quos uocāt Græci ASTHMATICOS? M. eos nēpe: qui sine febre crebro respirant, ueluti solent qui celeriore cursu defatigati sunt. H. Nos uerò Latini quo solemus uti uocabulo, dum hos uolumus indicare? M. Anhelosos ac suffiriosos uocitamus: Sæpe etiam Orthopnoicos appellamus; propterea quòd Thoracis corpus rectum habere cogantur metuentes ne suffocentur. H. Quo modo autem gignitur Asthma? M. Fit Asthma, cum aut Crassorum humorum, aut uiscosorum ingens copia pulmonis bronchijs infarcta fuerit: magno etiam cum negotio spirare consueuerunt, qui asperam arteriam multa disillatione refertam habent. H. Qualis &

erit hominum uictus? M. Calidus & siccus, uitandusq; illis fuerit aër frigidus, atque humidus.

H. Utendum igitur carnibus Perdicum; auicularum montanarum, gallinarum, caponum, & similia: Fugiendi etiam erunt pisces, fructus, legumina; eaq; omnia, quæ crassos & glutinosos humores procreare solita sunt. M. Recte dicis mi Hortensi: sed adde etiam (si placet) frequenter utendum esse, Hisopo, Oreosclino, & Fœniculo; Vinumq; potandum quod tenuis substantiæ sit.

DE ANI R I M I S.

H. Audio de multis fide dignis in hisce ædibus adesse quàm plurimos, qui anum male affectum habeant. explica igitur (si nō graue tibi ducis) quæ affectiones anum consequi soleant. M. dicam quidquid super hac re in mentem mihi uenerit. Visuntur quàm sepiissime quædam Rimæ Sedis, quas Græci Ragadas uocant; & ut planius tecum agam, Sunt Scissuræ in musculo anum claudente; aut in extrema ani Corona; non ijs dissimiles, quæ in labijs à Boreæ asperiore flatu accidere consueuerunt. H. Sed quid in causa est ut illæ scissuræ fiant? M. Acrium humorum defluxus. H. qua ratione curandi erunt? M. dicam; necesse erit, ut quàm optime purgentur; deinde illinere soleo scissuras Vnguento candido Caphurato. non ad uiuum omnia, mi Hortensi, nunc refeco, siquidem, hic ego medicum non instituo, neq; profiteor tanti me esse, ut medendi artem possim tradere: tantum tecum familiariter ago, cum, ut tibi, homini (ut mihi quidem uidetur.) perhumano

7

satisfaciam, tum etiam, ut quæ olim didici, in memoria mihi ipsi redigam.

D E B U L I M O.

H. Quando quis BULIMVM sentit? M. Cum stomachus à fame labefactatur, paulatimq; adeò frigore corripitur; ut extremæ partes omni prorsus calore destituantur. H. Qui solet curari Bulimus? M. aceti, panisq; calidi olfactu: facile etiam curationem recepit; si gelida ipsa corporis extrema colluantur: sunt etiam qui affirmant Pulegij olfactu maxime recreari posse.

D E B R A N C H O.

H. Quid etiam BRANCHVS? M. Est Branchus Catarrhi species guttur maxime arripiens; arteriarumq; asperitate fauces imprimis graviter lædens.

D E B V B O N O C E L E.

H. Non intelligo quid sit BVBONOCELE? M. Est quando intestinum ad inguen usque erumpit; illicq; non ultra progrediens decumbit; & facile residet.

D E B A T R A C H O.

H. Quid uocas BATRACVM? M. Tumorem sub lingua; qui sanè pueros maxime tentare consuevit.

D E C A N I N O A P P E T I T V.

H. Qui nam hi sunt, qui CANINVM APPETITVM habere existimantur? M. Hi sunt, qui per ciborum multam copiam, sic appetunt, ut edendi appetentiam cohibere non possint. in ingerendis enim cibis omnem excedunt modum, nullamq; servant mediocritatem. H. Sed (obsecro) cur Caninus dictus? an quòd de more Canum Saturi facti sepe reuertantur ad

uomitum? M. Sic opinor. H. Sed cur talis sit appetitio? An à frigida uentriculi temperie, uel ab accidis humoribus os uentris irritantibus? M. Recte putas. H. Verum unde frigida uentriculi temperies dignoscitur? an à deprauata concoctione, inflatione, fluctuatione, murmure, ac egestionem? M. Rem tenes. H. Cuiusmodi panis his hominibus exhibetur? M. Nec recens, nec bene fermentatus. H. qui Cibi? M. Pingues, & oleos. H. Quæ sorbitiones his proderunt? M. Hæ nempe quibus mel oleum, gallinaceus adeps, & butyrum iniectum fuerit. H. Quibus uestetur oleribus? M. malua, quæ certe ualde eis proderit. H. Cedò quod uini genus illi propinabis? M. quod sit colore fuluo, substantia tenuè, quod sit odoratum nullaq; adstringendi ui præditum: eiusmodi enim uina uentriculum calfaciunt, humorumq; perdunt & destruunt acorem, adeò, ut sæpe per se suffecerit ad perfectam curationem una cum pinguibus oleosisq; edulijs.

DE CHOLERA.

H. Quid CHOLERA? eadem. n. uox est cū Græcis usurpata, tum Latinis. M. Est biliosus uomitus, nidorosus et accidus diutius perstans, quò sane tempore uenter etiam inferne eadem simul excernit. H. Vnde exoritur? M. A multa cruditate, quæ sæpenumero ex insigni alimentorum prauitate uitiosorumq; humorum copia originem trahit: huic certe morbo, nulla interposita mora succurrendum statuo: est enim acutissimus morbus, grauissimamq; Syncopim, si diutius perseueret, facile inducit.

DE COLI DOLORIBVS.

H. Et hanc quæso partem ne intactam relinquito, sum enim huic morbo obnoxius, atq; haud scio qua ratione aduersus eius morbi uim tueri me possim. M. Præbe igitur attentum animum. Dolor, qui in laxiore intestino, quod Colon appellant, suboritur, multis sanè de causis accidere solitus est: primum quidem propter crassos & pituitosos humores intra Coli ipsius membranulas residentes: Sæpe etiam propter Flatulentos spiritus, quibus nullus patet exitus. accidit etiam ut inflammatio intestinum torqueat, maleq; habeat: adsunt etiam sæpenumero acres & erodentes humores, qui intestinum infestant; & duriter affligunt. H. Postquam intellexi causas, è quibus tam acerbus dolor oriri consuevit, facile posthac cauebo, ne amplius obrepat. perge ad reliqua pertractanda: sum enim tui audiendi multo audior, quàm dudum fuerim. M. pergam, sequere tu.

DE CANCRO.

H. Quid est CANCER? M. Est morbus, qui in omnibus ferè corporis partibus nasci consuevit, præsertim autem in earum sceminarum mamillis, quæ naturali menstruo non belle expurgantur. Ouidius sic eius morbi meminit. VT MALVM LATE SOLET IMMEDICABILE CANCER SERPERE; ET ILLÆSAS VITIATIS ADDERE PARTES. Caro etiam de Re Rustica de Brassica loquens, sic scribit. EADEM BRASSICA VVLNERA PVTRIDA CANCROSQVE

PURGABIT. Sunt qui putent Cancrum differre ab Elephantiasi; quod Cancer unum tantum inuadat membrum. Elephantiasis uerò uniuersum depascatur corpus.

DE CARBUNCULO.

H. At CARBUNCULVS unde prouenit? M. Ex uehementis inflammatione, eminentq; super eo pustula quædam nigra, interdum ædem subliuidæ; aut pallidulæ cernuntur: in quibus etiam sanies existit. Hunc morbum Græci Anthracem uocarunt. Plinius libro XXVI. scriptum reliquit Carbunculum in Italia primum extitisse, L. Paulo; & Q. Martio Censoribus, esseq; peculiare Narbonensis Gallie uitium.

DE CARCINOMATE.

H. Quem tu morbum credis esse CARCINOMA? M. Non desunt qui putent idem esse cum Cancro, & tantum in hoc differre, quòd superiores partes in primis occupet; ueluti nares, & aures. Cato uerè existimat brassica trita sanari facillime posse. Hoc morbo diu afflictata est Galla uidua Romana Symachi uiri Patricij filia foëminarũ præstantissima.

DE CEPHALAEA.

H. Dic (si lubet) quid est CEPHALAEA? M. Est diuturnus capitis dolor Cephalea: Barbari Sordam appellant: accidit autem quàm sæpius ex humorum magna copia. nec te lateat uelim oboriri capitis dolorem uel à Pituitosis humoribus, uel à Biliofis, uel ex plenitudine, interdum à siccitate, interdum à Frigore; sæpe etiam à calore.

DE COR=

DE CORDAPSO.

H. Narra nunc de CORDAPSO. M. Narro lubens, dicoq; esse morbum tenuioris intestini, quem Recentiores Iliacum appellarunt.

DE CANDILOMATE.

H. Explica quid sit CONDILOMA. M. Tuberculus est, qui nullo modo curationem recipit, nasciq; solet circum podicis coronam; sunt qui affirmant provenire solitum ex nimia inflammatione: in eo apparent eminentes quidam tumores, nunc molles, nunc duriusculi, sphericæ figuræ. tres autem solent esse Podicis morbi, nempe Rhagadia, Hæmorrhoids, & Condyloma: de quibus agam cum plus ocij nactus fuero.

H. age (ut lubet) nihil enim opto, quod tuo magno commodo fieri non queat.

DE CHIRAGRA.

H. Quem tu morbum esse putas CHIRAGRAM? M. Si Ethimon consideres, facile dixeris esse manuum morbum, quo sanè morbo quicunq; afficiuntur, Chiragrici uocantur: eius meminit Horatius in hunc sanè modum scribens, NODOSA CORPVS nolis prohibere Chiragra.

DE GHEMOSI.

H. Quid appellas GHEMOSIM? M. Eum nempe oculorum morbum, cum præ nimio tumore sic ambæ adglutinantur palpebræ, ut ne conuiuere quidem liceat (etiam si maxime coneris.)

DE CERIO.

H. Perge narrare mihi de CERIO. M. Puto genus Vlceris esse, dictumq; à faui similitudine, quam re-

tinet, Plinius, huius morbi tum præclare meminit,
cum inquit RAMORVM FICI TENERI
CAVLICVLI VNA¹ CVM MELLE VL=
CERIBVS, QVAE CERIA VOCANTVR,
COMMODE ILLINVTVR.

DE CIRCOCELE.

H. Volo etiam mihi narres de CIRCOCELE (nisi mo=
lestum fuerit.) M. Narro: tunc fit morbus, quando
intumescunt uenæ, & Scroton ualde complent, fitq;
Testiculorum alter, altero duplo maior.

DE CATHALEPSI.

H. Quid est CATHALEPSIS? M. Medius existit
is morbus inter Lethargũ, & Phrenesim: tum enim
non abest febris, nec abest melancolicus humor, &
qui sic afficiuntur, oculos habent ferè immobiles.

DE CONVULSIONE.

H. Quæso quãdo meritò dixerit quispiã se CONVUL=
SIONEM pati? M. Cum nerui, atque musculi ad
eundem cogentur affectum, ad quem ab animali fa=
cultate, cum naturæ habitum seruarent, duci soliti
erant: Græci spasimum uocant: Huic pellendo mor=
bo scito Ptisanæ cremorem esse perutilem, detra=
hendumq; sanguinem ex cubiti uena media. Sentiet
etiam præsentaneum remedium quisquis affectus eo
fuerit morbo, si partes quæ conuelluntur, lana iri=
no oleo imbuta, perfricauerit: non desunt etiam
præstantes Medici: qui doceant, Conuulsas partes
Lupinis pellibus conuestiri debere: quæ si fortè de=
fuerint, Vulpinas capiunt, ijsq; affectas partes pro=
bè contegunt.

DE COLVMELLA.

H. Si COLVMELLA inflammetur humorum nimio quodam fluxu; qui potero ego ei morbo opitulari, quare ratione uictus opem feram? M. Utendum eo uictu fuerit, quo in reliquis inflammationibus uti consueuimus: Scapulis deinde cucurbitulæ affigenda, alius Clysteribus subducenda. sic enim profecto fiet, ut non solum exinarianantur; uerum etiam ut à loco affecto confluentes auertantur humores; nec spernenda erunt præsidia, quæ fluxum cohibeant, cuiusmodi sunt quæ adstringendi facultatem habent. Itaque hac erit meo iudicio collutione utendum: Capiat Succi rosarum, Plantaginis, Prunellæ, Oxalidis, Solani parteis æquales dragmæ ij. Diamoron, Rob de Ribes, parteis æqualeis dragmæ v. Rob ex Oxiacantha, quam Berberim uocant, dragmæ iij. aceti in quo Rhus, hoc est Sumach maceratus fuerit: externe autem proderit spongijs oleo Amigdalino madefactis ac expressis fouere ceruicem, aut mollis lana oleo imbuta collo erit circumponenda: admouendaq; erunt Cataplasmata ex ordeï Farina, Lini semine, aut fœni græci confecta.

DE CACHEXIA.

H. Cuperem etiam ab ste scire (uideo enim quantos progressus in medicinæ studijs habeas) quid sit CACHEXIA. M. Ego Cachexiam malum corporis habitum appello, à quo alimentum corrumpatur. H. Sed quo nam modo accidit? M. Cum ipsum corpus diutina ægritudine attenuatum, ob magnam imbecillitatem, nullo quidem pacto recreari ac reffici potest.

B ij

H. Solet ne alia de causa accidere? M. Solet quidem; præsertim si excrementa corporis (plusquam par sit) retineantur.

DE MORBO COMITIALI.

H. Cum hic multi sint COMITIALI MORBO laborantes, dic (obsecro) uires eiusmodi? M. dicam (si potero.) Is morbus, tantam animi consiarnationem affert, affectumq; adeò de mentis statu dimouet, & alienat; ut uelit, nolit, uenæ palpitent; membra langueant; cogaturq; humi procumbere. unde etiam caducum appellarunt multi. H. Cur Hercules postea à tã multis est dictus? M. Quòd eo morbo aliquando laborarit Hercules. H. Cur etiam Sacer uocatus? M. Quod illam partem maxime lædat. quæ sacra sit, nempe cerebrum ipsum. H. Quid in causa, quòd etiam Comitialis diceretur? M. Quoniam accidit ut primus Romanorum tali morbo in Comitijis corriperetur. H. Quinam sunt ei morbo imprimis obnoxij? M. Qui præcellenti sunt ingenio; atrabilanijq; existunt: itaq; (non iniuria) hoc morbo afflictus est Plotinus Aegyptius Platonice sectæ philosophus: laborauit & Cambyfes, Iulius Cæsar, & Liuius Drusus Tribunus plebis, qui eam ob causam Anticyram proficisci coactus est: non omitam capparis usum mirifice prodesse; obesseq; plurimum, Sinapi, allium, cæpe, meraciusq; uinum.

DE CORIZA.

H. Qualis morbus est CORIZA quid ue parit? M. Humore quàm plurimo nasum Coriza obstruit. H. Vt

11

illud morbo appellant Latini & M. Grauedinem
(si non fallor) appellant.

D E C Y N A N C H E .

H. Quando quis dicitur CYNANCHE laborare?
M. Quando uox nihil potest exprimere, idq; ob
crassiores Pituitas in ipsas fauces delatas. H. Sed
cur sic appellatur? M. Quod ea Canes maxime la-
borare consueuerint.

D E C O R I A G O .

H. Si non molestum est, dic etiam de CORIAGO,
a quo enim maxime scire quid sit, qualesue corporis
partes maxime offendant? M. In ipso quidem no-
stri sermonis initio, constituimus de ijs tantum mor-
bis familiariter agere, à quibus humana male tra-
ctantur corpora; at hic morbus Bubuli pecoris esse
solet, non hominum. H. Quibus notis deprehendi
solet? M. His nempe, si pellis sic tergori adhære-
scat, ut à costis diuelli nequeat. H. Quo autem mo-
do oriri solet hic morbus? M. Si Bos præ languo-
re maciem contraxerit, aut strenue in rusticano ope-
re sudans, subito refrixerit.

D E C R E T H E .

H. Quid est ille morbus qui dicitur CRETHE?
M. Est Tuberculus palpebræ innascens, hordei si-
militudinem quandam exprimens, unde etiam multi
adducti sunt, ut Hordeolum appellarent.

D E C H A L A Z I A .

H. Cum sæpe inter medicos sermo fiat de CHALAZIA,
nolim ego diutius ignorare quid Chalazia sit.
M. Morbus est non admodum ei morbo dissimilis,

de quo prius tam paucis egimus, nempe cum albi coloris tuberculus grandinis speciem habens palpebris multa cum molestia innascitur.

DE COPHOSI.

H. Quid (obsecro) est C O P H O S I S ? M. Est aurium molestissimus morbus surditatem maxime creans.

DE CIONE.

H. Explica (si me amas) aut à me te amari existimas, quid putes esse C I O N E M ; siue, ut alij dicunt, Cionida? M. Existimo ego illum esse morbum, cum caro in faucibus nimium excrescens uocem sic impedit, ut ne hiscere quidem liceat.

DE CALCULO.

H. Quid est C A L C U L U S ? M. Est morbus renes maxime lædens. H. Vnde nam prouenit? M. Ab imbecillitate eius facultatis, quæ concoquendi munere defungi (natura) solet. H. Creatur ne in alia corporis parte quàm in renibus? M. Maxime, nempe in Vesica, tumq; Lithiasis appellari consuevit.

DE CARDIACO.

H. Quam (obsecro) corporis partem affligit C A R D I A C U S ? M. Os uentris. accidit uerò Cardiacus cum febre acuta; arteriarumq; crebro motu. H. Quæ ratione succurri potest? M. Si flabellum admou eas sæpeq; uentiles. Taceo nunc alia præsidia quæ sanè & multa & leuia sunt.

DE CAELIACO.

H. Narra de C A E L I A C O (si non graue est) M. Narro cum libenter, tum etiam quoad fieri potest breuiter. Scito itaq; Cæliacum dici, cum emollita aluo,

ob imbecillitatem, liquida egeruntur. H. Quid cauisse esse putas, ut liquida egerantur. M. Frigidus superuacaneusq; cibus, uehemens calor & perpetuum frigus in causa saepe sunt.

DE CARO.

H. Quid est CAROS? M. Est passio, quam sequi solet priuatio non solum sensus, sed & uniuersaq; motionis; illaesa tamen, & inoffensa ipsa Spirandi facultate: Arabes Subet appellarunt. his ego qui sic affecti sunt, exhibere soleo, eam uictus ratione, quam lethargicis etiam exhibeo, parans ea medicamenta, quae stomachum & calfaciant, & simul corroborent.

DE DISPNEA.

H. Quem morbum uocant Medici DISPNEAM? M. Grauem ac difficilem anhelitum.

DE DIABETE.

H. Velim etiam ab ste scire, quid sit Diabetes? M. Dicam: est morbus renum, qui prauo tetroq; humore congesto, sitim affert magnam. H. Qui potest eiusmodi morbus depelli? M. Superuacanei humoris inanitione.

DE DISCOIA.

H. Postquam uideo nihil non tibi doctissime magister probe notum esse, quod ad medendi artem spectet, significa (quaeso) quid credas dici apud medicos Discoiam. M. Non aliud est Discoia, quam audiendi difficultas quaedam curatu difficilis, ut saepe sum expertus.

DE DRACONTIO.

H. Loquamur nunc (si libet) de DRACONTIO.

B iiiij

M. Per me quidem libeat de quo tu uoles morbo ro-
gitando interpellare. H. Quid est Dracontium?
M. est morbus, quo Indij, Egyptijq; maxime affli-
ctari solent. H. Quæ uerò membra consuevit in-
primis dracontium inuadere? M. Musculosiora quæ
fuerint, ueluti Guttur, Brachia, Coxas, & Crura.

DE DYSURIA.

H. Audio sæpe multos in hisce ædibus de DYSURIA
grauiter conquerentes. Dic igitur quid Dysuria sit?
M. est urinæ summa difficultas, supprimitur enim
tum urina ab ipsis Vesicæ affectionibus, quæ plu-
rimæ sunt.

DE DIARRHOEA.

H. Quid DIARRHOEA? M. Existimo ego esse copio-
sum sine ulla exulceratione ullaq; inflammatione
alui profluuium. H. Cur Diarrhoea fit? M. Pro-
pter imbecillitatem instrumentorum uentris: pro-
pter alimenta copiosiora, humidiora, uiscosiora
& corrupta; adde etiam ob imbecillitatem reten-
tricis facultatis.

DE DYSENTERIA.

H. Satisfecisti tu mihi quidem peregre regie Dysuriam
explicans, naua etiam mihi tuam operam in expli-
cando, quid DYSENTERIA sit? M. Facio libens,
affirmoq; Dysenteriam esse intestinorum exulcera-
tionem, qua qui laborant, Dysenterici uocitantur.
H. Vt Latini ægritudinem hanc appellant? M. Tor-
mina (si non me animus fallit.) H. Vnde nam proue-
nit? M. Ex cibo qui sit, aut nimium acutus, aut
parum concoctus.

DE EPVLI.

H. Quid est EPVLIS? M. Tumor quidam non longe à gemino dente nascens, qui saepe & cum febre, & cum tam uehementi dolore nos adoritur, ut ne hiscere quidem possimus.

DE EPHIALTE.

H. EPHIALTES qui nam morbus est? quid ue in nobis mali efficit? M. Hoc infestati morbo, putant se noctu strangulari; ex eminentiore loco in terram labi, membro aliquo colligari, & uoce parataq; Veneri prohiberi. H. Nihil ne aliud mali parit Ephialtes? M. maxime, nam si inueterascat, Epilepsiam, aut Apoplexiam afferre solet. H. Vnde nam quæso oriri consuevit? M. Ex atra bile, crassiq; humoribus cerebrum petentibus.

DE ENTEROCELE.

H. Quid ENTEROCELES? M. Est cum intestina ipsa in testiculos defluunt. Meminit huius morbi Martialis Poeta libro decimo: cum inquit, ENTEROCELARVM FERTVR PODALYRIVS HERMES.

DE EPNEVMATOSI.

H. Ne me (quæso) celes docte, & præclare magister, quid sit EPNEVMATOSIS. M. Est uentris inflatio ob pituitosos humores in uapores resolutos. H. Sed unde nam fit istæ resolutio? M. A mediocris calore fieri consuevit.

DE ENCANTHI.

H. Age (precor) quid est ENCANTHIS? M. Morbus est ad oculos maxime spectans; fitq; cum Tu-

berculus oculi angulum sic occupat, ut ægre deduci
Palpebræ possint. H. Quinam sunt huic morbo
maxime obnoxij? M. Nautæ. H. O hominum ge-
nus teterrimum, maioriq; infortunio dignum.

DE EPIALO.

H. Quid est EPIALOS? M. Est species febris ex
frigida pituita suboriens.

DE EPIPHORA.

H. Quando dici (iure) potest EPIPHORA? M. Cum
humoris alicuius defluxu discriatiatur oculi. H. Qua
nam (quæso) ratione ei morbo succurri potest? M. Si
Plinius non fallitur, Pepones Epiphoris egregium
præstant medicamentum: quanquam Columella ue-
lit Magudarim contusam, Polenta conspersa, ipsum
morbum facilius posse suppressere.

DE EPINYCTIDE.

H. Quid est EPINYCTIS? M. Est ulcus, oculorum
aciem hebetiorem efficiens. H. Quo modo tollitur?
M. Porri sectiui folijs, nec non alio meliore modo
(quod ipse nouerim) tolli potest.

DE ECTROPIA.

H. Qui nam morbus est ECTROPIA? M. Est mor-
bus oculorum à Lagophthalmia planè diuersus.

DE EMPHISMA TE.

H. Quid est EMPHISMA? M. Est tumor Palpebræ
ledens, nō desunt tamen, qui dicant esse spiritus in-
flationem sub cute, quæ quandoq; in uentre, &
quandoq; in interraneis fiat.

DE EPICAVMATE.

H. Quid est EPICAVMA? M. Est sordidum ulcus,

quod cum expurgatur humida fere omnia quæ intro sunt, statim effluunt.

DE EMPYEMATE.

H. Vnde nam prouenit EMPYEMA? M. Ex com-
maculato sanguine, uel ex alicuius uisceris tecto ul-
cere. H. Sed ad quam partem corporis pertinet?
M. Scito Thoracis esse morbum, non aliarum par-
tium (quod ego sciam.)

DE ELEPHANTIA.

H. Qualis morbus est ELEPHANTIA, siue Ele-
phantiasis? M. Morbus est Lepre haud dissimilis,
crebras in summa cute maculas gignens, crebrosq;
tumores, rubore tamen paulatim sese in atrum co-
lorem uertente. Hoc morbo quicumque affecti sunt,
omnes corporis partes nauulis quibusdam rubris
inflatas habent. H. Vnde nam tale nomen tractum
putas? M. Ab Elephanto animali, cuius cutis ulce-
rosis uallibus nescio quomodo exaratur. H. Diu ne
est quod hic morbus Italiam peruasit? M. Scriptum
reliquit Plinius, morbum hunc in Italia non exti-
tisse ante Gn. Pompeij tēpora. Meminit eius morbi
Lucretius libro sui Poematis sexto, sic inquit
EST ELEPHAS MORBUS, QUI PROPTER
FLUMINA NILI GIGNITUR ÆGYPTI
IN MEDIO, NEQUE PRÆTEREA VS-
QVAM. Memini etiam Galenum recensuisse Ele-
phantiasim inter pueriles morbos H. Differt ne à le-
pra? M. Quid ni? cum lepra habeat cutis impetigi-
nem quandam, ueluti scabiem, Elephantiasis uerò, nō
tantū cutim, sed neruos, et ossa uitiet, et corrumpat.

DE EROTE.

H. Quid (amabo) est EROTES? M. Morbus est (si quid iudico) ualde melancholicus, nimia amoris abundantia proueniens. H. Quibus remedijs tolli potest? M. Largiore uini compotatione, balneis multis, gratioribus spectaculis, alijsq; iucundissimis rebus, quæ mentem animumq; subtristem à tetrīs cogitationibus dimoucant, & adducant.

DE FEBRE.

H. Quot putas esse FEBRIVM genera? M. Varia certè. Est enim Cottidiana, quæ Pituitosis accidit. H. Accidit ne alijs? M. Maxime etenim compertum est, accidere etiam pueris, hiemis præsertim tempore, necnon & his, qui prouectiore sunt ætate, idq; uel ob nimium cibum, quem stomacho ingessere, uel ob uitam quā ociose nimis traduxerant, hæc certam habet periodum. H. Quo nomine solent Græci id genus Febris appellare? M. (si non fallor) Ephimeram appellant. Extat etiam Febris putris. H. Qua nota dignoscitur? M. Expulsu arteriarum inæquali, caloreq; magno, & fumoso accedente. H. Quibus remedijs sanari potest? M. Sanguinis missione, humorumq; inanitione. H. An non habemus etiam continuam, quæ nullam patitur intermissionem? M. Quid ni? H. Cupio igitur scire, quo etiam modo acuta Febris dignoscatur? M. Si ægrotantis lingua nigra sit, si excrementa sicca habeat, si uehementem sitim persentiscat, si mens non satis suum faciat officium, & si noctu parum conquiescat. H. Expedi etiam de Tertiana. M. Fa-

ciam libenti animo : est autem Tertia una quidem die perstans , & tertio rediens . H. unde nam ducit originem ? M. A' Flava bile . H. Quæ nam est eius uis & natura ? M. Horrorem incutere , si timiq; inferre , præsertim in ipso quidem accessus initio . H. Quo potissimum tempore solet nos adoriari ? M. Aestiuo . H. Quibus præsidijs curatur ? M. Si alius deiciatur , si urina laceßitur , & si Appij potiuncula propinetur . H. Sed unde (quæso) nascitur quartana Febris ? M. A' frigido humore , atraq; bile : hæc calore cedit quidem ipsi tertianæ , ob idq; solita est plerunq; autumnus nos aggredi . H. Quo solet præsidio tolli ? M. Parcioris cibo , tenuiore uino , & albo , tribusq; piperis granis ex aqua frigida sumptis . H. Vnde nam putas esse dictam ? M. à feritate , eaq; affecti qui sunt , dicuntur à 'grammaticis Febrere , Febricitare , & Febricitari . Scribit Plinius perpetuam fuisse Febrem . Gn. Mecenati , cui etiam trienio supremo uitæ suæ nullo horæ momento somnus contingit . Antipater etiam Poeta Sydonius quotannis Natali die Febre corripitur solitus erat .

D E F I C O .

H. Narra quæ ægritudo sit hæc quæ Ficus appellatur ? M. An non cernis in hoc calamitoso homine esse uitium , quod oculis adnascitur , quodq; summa cum difficultate conuelli potest ? H. Vnde oritur ? M. à nimio pruritu . H. Quas partes in primis solet appetere ? M. Eas certe , quæ pilis continguntur .

DE FURUNCULO.

H. Narra item de FURUNCULO? M. Tuberculus est cum inflammatione, & graui dolore, qui tandem in pus uerti consueuerit. En uides hic rusticum hominem Furunculis plenum. H. Video sanè, eiusq; uicem mirandum in modum doleo.

DE GANGILIO.

H. Quando fit GANGILIVM? M. Cum humor quidam includitur in ipso capite. Fit etiam Gangilium cum neruus quidam contorquetur.

DE GEMVRS A.

H. Quo morbo misellus hic sic grauitè laborat, ut pedibus uix queat consistere? M. GEMVRS A. H. Qualis est hic morbus? nunquam enim memini me legisse de eiusmodi morbo uel apud Galenum, uel apud Hippocratem. M. Fieri quidem potest. Plinius tamen libro uigesimo sexto ait esse morbum inter pedum digitos nascentem, qui sanè morbus curationi minime resistit aut contumax est.

DE GLAUCOMATE.

H. Quem morbum appellas GLAUCOMA? M. Genus morbi est Crystallini humoris in Glaucum humorem permutati.

DE GONORRÆA.

H. Quali morbo est is senex affectus qui à dextra asidet? M. Gonorrhæa, est autem Gonorrhæa emissio seminis minime spontanea. H. Vnde nam prodit? M. Ab imbecillitate. H. Quomodo speras illi posse suppetias ferre? M. Multis quidem modis, sed in primis abstinentia rerum infantium.

DE CANGRANA.

H. Quid est CANGRANA? M. Est uehemens quædam scabies curatu perdifficilis, præsertim si magnus aliquis tumor membrum afflixerit.

DE HECTICA FEBRE.

H. Quando HECTICAM appellabimus FEBREM?

M. Quando calor præter naturam non modo in ipsis spiritibus, & humoribus, sed in solidis etiam partibus consistit. H. Cur Hecticam uocant? M. quod firma ac fixa sit, summaq; cum difficultate soluatur, ut solet habitus. Sunt etiam qui affirmant, idcirco Hecticam dici, quòd corporis habitum uniuersum comprehendat. H. Hecticæ uerò febres quo nam modo gignuntur? M. Dicam quanta maiore breuitate potero. Sic enim hætenus consueui: primum magna quidem ex parte, ex ardenti Febre, quæ usque adeo protrahitur, ut temporis diuturnitate contentum humorem absumat. sed de his satis, medicum enim non instituo, sed quæ ad artem spectant tantum leuiter attingo: uereor enim mi Hortensi, ne fortasse artis difficultate perterritus, ab ijs alienere studijs, ad quæ ego te magnopere incensum & inflammatum cupio.

DE HETEROCRANEA.

H. Quid hoc (quæso) morbi est, quando ue fit? M. Fit cum ipsum caput inæqualiter angitur, atque intumescit, surguntq; ulcera cum rotunda, tum etiam paululum tumefacta.

DE HIDREONE.

H. Quid (obsecro) est HIDREON? M. Est, cum

aqua cutis super modum extenditur .

DE HIDROCEPHALEA.

H. HIDROCEPHALEA cuiusnam partis humani corporis est morbus? M. Capitis, fitq; quoties humor cutim perflat, & membranulas extendit.

DE HIDROPE, SIVE MAVISA.

DICERE HIDROPISI.

H. Qualis est hic morbus, qui huic homini usque adeo fecit uentrem intumescere, ut si uultum, reliquaq; membra non inspexeris, non hominem, sed quiduis aliud potius inspicere te credas? M. Morbus est aqueus, subcutaneus. Multa enim congesta est sub cute aqua, quo fit ut uenter sic (ut uides) intumuerit. H. Quisquis Hidropisim patitur, quam potissimum affectionem persentiscit? M. Ut sitim exple-re nequeat. quamobrem Horatius celebris Poeta & inter primos meritò referendus eius morbi cum meminisset, inquit. CRESCIT INDVLGENS SIBI DIRVS HIDROPS, NEC SITIM PEL-
LIT NISI CAUSA MORBI FVGERIT
VENIS ET AQVOSVS ALBO CORPO-
RE LANGVOR. Hoc morbo laborauit Aristarcus qui sub Ptolomeo floruit, laborauit & Iulius Via-
tor Eques Romanus, uirq; per illustris.

DE HERCVLANO MORBO.

H. Quo morbo hic bonus uir afficitur, de quo iam conclamatum esse audio? M. Herculano morbo la-
borat, est autem Herculanus morbus ex eorum clas-
se, cui nullo medicorum auxilio subueniri potest.

H. At quando eboriri solet talis morbus? M. Tum,

cum

cum caro in humorem crassum, & spumantem colliquescit. H. An non etiam alio nomine à scriptoribus appellare consuevit? M. Maxime, nempe Diuino, quod Diuinam, hoc est rationalem animi partem occupet, & præpediat.

DE HIDROCELE.

H. Quando dicitur HIDROCELE? M. Cum intestina defluunt, & colliguntur. Meminit Martialis libro xij. in hunc sanè modum scribens. OMNES QVEM MODO COLEI TIMEBANT DICENTEM TVMIDAS IN HIDROCELLAS.

DE HEMICRANIA.

H. Quid HEMICRANIA? M. Est capitis affectio magnum inferens dolorem circum mediam corporis partem, nunc dextram, nunc sinistram: fit autem sæpiissime ex magno humorum fluxu, siue frigidi, siue calidi sint.

DE HYPIPHASMATE.

H. Dic etiam (si non graue est) quid HYPISPHAMA? M. Est uenæ confractio, ab aliquo grauiore ictu proueniens.

DE HYPTASMO.

H. Multos exaudiui ab eo tempore quo ego huc appuli, duriter lamentantes se HYPTASMVM perferre ac pati, cupio itaque scire quid hoc morbi sit. M. Scito nihil aliud esse, quàm stomachi euerfionem, à prædominante malo quopiam humore natam.

DE HARPE.

H. Quid de HARPE mihi narrabis? M. Narrabo humorem esse ex flauabile prouenientem, à quo to-

tum sanè corpus longe lateq; corripì solet.

D E H Æ M O R R O I .

H. Quale morbi genus esse, dices esse H Æ M O R R O I M?

M. Dicam esse genus morbis quo qui capti sunt, sanguinis fluxum perferre compelluntur. H. Adhiberi ne potest (quod ipse noueris) aliquod excellens praesidium? M. Scripsit Plinius Allium potu exhibitum, uel cibo, uel illitu sanandis Hæmorroidibus prodesse quàmplurimum.

D E H I C T E R O .

H. Quid est H I C T E R V S? dic (amabo) audacter:

nam nihil harum rerum latere te puto. M. Est bilis effusio per uniuersum corpus, quæ tamen bilis, nunc flaua, nunc atra est. H. Sed unde nomen traxit?

M. Ab Ictero aue, cuius conspectu nos sanari compertum est. H. Quibus signis talis cognosci potest morbus?

M. Ex oculorum colore, tum enim album quod est, luteum fit. H. Vnde procedere existimas?

M. Existimo ego procedere tam ex sple-

ne male affecto, quàm ex epate. H. Quæ accidunt his, qui talem perferunt ægritudinem?

M. Nullam habere solent ciborum appetentiam, albaq; excrementa egerunt. Martialis lib. ij. huius morbi mentionem facit in hunc modum scribens

DICET ET
ICTERICAM SI FORSITAM ALTERA
MOECHA.

D E I L E O .

H. Dixisti cum primum huc ueni, te hic habere I L E O S
s o s multos tuæ fidei, tuæq; industriæ commissos,
tum incesit summa uoluntas sciendi, quid I L E O S

Sit. M. Est morbus gracilioris intestini, quo affecti, ileosi dicuntur, sicq; appellatum existimo, quod circum uoluantur dolores, indeq; à Latinis uoluum fuisse dictum. H. Cur id uitij nascitur? M. Ob assiduam ciborum corruptionem, eiq; Anethum incoctum, & potatum facile succurrit.

DE IMPETIGINE.

H. Quid est IMPETIGO? M. Est ipsa cutis defectio non sine magno pruritu: meminit Quintus Serenus qui medicinam non infœlici Poemate completus est, sicq; inquit. SI VERO VITIVM EST QVOD DVCIT AB IMPETE NOMEN, HOC MATVTINA POTERIS COHIBERE SALIVA: à nonnullis Petix et Petigo appellatur.

DE INCUBO.

H. Quid hoc morbi est? M. Est cum quis noctu graui se mole opprimi arbitratur, aut ab aliquo repente inuadi. H. Vnde tale nascitur uitium? M. à diuturna uentriculi cruditate. H. Qui solet curari? M. Sanguinis missione, & herbæ peoniæ nigro semine commanducato.

DE INTETRIGINE.

H. Quando fit INTETRIGO? M. Quando nerui in aliqua corporis parte contrahuntur. H. Quo medicamento tolli potest? M. Cato ait, morbum hunc sanari posse si Absinthij Pontici surculus gestetur sub annulo, sed tu fortasse anilem superstitionem esse credes.

DE IGNE SACRO.

H. Quid est quod eiulantes audio, tum multos dextror=

sum commorantes? M. Hi sunt qui Sacro igne correpti dolent & ingemiscunt. H. Quid est hic Sacer ignis? adeò ne inter mala ulcera recensetur? M. Duo sunt Sacris ignis genera, quorum alterum subrubrum est, quod fit in Pectore, Lateribus, & Plantis, alterum uerò in summa cutis exulceratione, sine tamen ulla latitudine. H. Cur dictus est sacer? M. Propter uehementem admirationem, quòd nihil ferè habeat cum alijs morbis commune.

DE ISCHIADICIS.

H. Qui nam sunt ISCHIADICI? M. Sunt qui Coxendicum dolore correpti conqueruntur & miseris modis excruciantur. H. Vnde (amabo) gignitur eiusmodi morbus? M. à crasso pituitosoq; humore, qui in coxarum articulis concretus residere solet. His si tu uenam in Poplite secueris, præstans exhibebis remedium.

DE ISCVRIA.

H. Quid est ISCVRIA? M. Est Vrinæ suppressio, ita enim tum cohibetur, ut emitti non queat. H. Vnde nam accidit? M. Sæpe ab imbecillitate, dum non potest uestica arcte complecti & exprimere quæ ab ea continentur: quàm sæpius etiam calculi crassiq; humores meatus obstruunt. Talis si tibi morbus accadat, uites (moneo) quæ urinam prouocant, ne nimia urinæ copia uestica nimis extendatur.

DE IECINORIS OBSTRUCTIONE.

H. Vnde nam fit IECINORIS obstructio? M. à Vaporosis crassisq; flatibus, & qui concoctioni facile resistant: interdum etiam à uiscosis humoribus. H.

Quo pacto alendi sunt? M. Cibis certe calidioribus, & qui aperiendi uim habeant.

D E L E P R A .

H. Cum nihil tibi tam facile sic, quàm ea narrare, quæ ad morbos spectant, uideor mihi posse te pro meo arbitrio, quando libet interpellare. dic itaque quid est L E P R A? M. Morbus est aut idem cum Elephantia, aut ab ea non multum dissimilis, de hoc sane morbo (nisi me animus fallit) intellexit Horatius, sic inquit, V T M A L A Q V E M S C A B I E S A V T M O R B V S R E G I V S V R G E T. Hunc morbum Allio exulcerari, sanariq; unà cum Origano testis est Plinius lib. xx. nonnihil similitudinis habet cum Psora, quanquam aliquanto altius sese immergat, pulmonesq; adeò corrumpat, & putrescere faciat, ut isto affecti morbo rauci fiant, summa cum difficultate loquantur, uixq; respirent, laborarunt hoc morbo Eunomius, Arrianæ Discipulæ sectator, Froila secundus, Alphonsi magni filius, & Andragasina uirgo clari apud suos nominis. Eijcit Lepram Syropus è Fumo terræ & Epitimi decoctum.

D E L Y C H E N E .

H. Si mihi præcellēs Doctor gratū cupis facere, expedi quid sint L Y C H E N E S? M. Sunt oris ulcera Cutaneum furfurē mire excitantia. H. Quo nomine appellant Latini medici? M. Mentagram appellant, meminit Martialis cum lib. ij. inquit. N O N V L C V S A C R E P u s t u l æ u e l u c e n t e s , N E C t r i s t e m e n t u m s o r d i d i q ; L y c h e n e s . F u i t h i c m o r b u s R o m a n i s m i

nime notus, ad ea usque tempora, quibus Tiberius
imperare cepit. sic tradidit Plinius lib. xxvi. cap. i.

DE LITHIASI.

H. O quàm inepte (ne dicam stulte) faciunt, qui medi-
cinam nulla græcarum literarum cognitione instru-
cti profitentur. Ego LITHIASIM græcam uo-
cem (ut arbitror) in medicorum libris sæpe repe-
rio, ignoro tamen quid sit Lithiasis. M. Est calcu-
laris morbus ex imbecillitate concoctricis facultatis
nascens, acciditq; uel renibus, uel uesicæ. Frangitur
lapis ubicunque residerit exhibito oleo ex piperi-
bus, uel ex scorpionibus confecto, aqua tamen mellis
potata lapidem gigni non permittit.

DE LYENTERIA.

H. Nulli ne adsunt in hisce ædibus, qui LYENTERI-
AM patiantur? M. Quàm plurimi adsunt. H.
Sed quid est Lyenteria? est intestinorum disolutio,
tum enim cibus non perficitur, sed planè incoctus
eijcitur. H. Vnde nam oboritur? M. Tum obori-
tur cum ora uenarum sunt ueluti obstructa: uena-
rum inquam, quæ alimentum ex intestinis ad se auel-
lunt. fit etiam interdum Lienteria ab imbecillitate
facultatis cibos in uentriculo concoquentis ac dige-
rentis. H. Qua uero ratione curatur? M. facile
morbum hunc curaueris, si facultatem retentricem,
& concoctricem, cum uentris, tum intestinalium cor-
roboraueris.

DE LIPPITVDINE.

H. Cum LIPPOS hic ego multos cernam, age quid est
Lippitudo? M. Est oculorum uitium humorem la-

chrimasq; emittentium, hoc sanè morbo laborasse
ferunt Horatium illo suo fortasse permoti testimo-
nio. HIC OCVLIS EGO NIGRAMEIS
COLLYRIA LIPPVS ILLINERE. Hero-
dotus in Polyhymnia scribit Eurythum & Aristo-
denum ob insignem Lippitudinem è castris à Leo-
nida domum remissos fuisse.

DE LAGOPHTALMIA.

H. Quid est LAGOPHTALMIA? M. Est oculorum
morbus, apparetq; is morbus cum palpebræ in su-
periora contrahuntur, fitq; ut de more leporum
apertis dormiamus oculis.

DE LEVCOMATE.

H. Cum assidue inter egrotos uersari mihi contingat,
si fortè LEVCOMATE inuenero, quid tu intelli-
gendum censebis? M. Nihil profectò aliud quàm
profundas quasdam maculas in oculis existentes.

DE LYCANTHROPIA.

H. Doce (si me amas) quid sit LYCANTHROPIA.
M. Est melancoliæ species, quæ cogit lupino more
affectos, in somnis fortiter ululare, & uociterari.

DE LETHARGO.

H. Superioribus diebus significatum est conquiescere
hic multos Lethargicos homines, incesit illico sum-
ma cupiditas intelligendi, quid sit Lethargus. M.
Est morbus à phrenesi omnino diuersus. H. Vnde
nam prouenit? M. Ab atra bile. H. in Lethargo
autem præter somni immodicam appetitionem quid
aliud mali extat? M. Mentis alienatio, ac rerum
ferè omnium summa obliuio. Meminit huius morbi

Boetius sic scribens. LETHARGVM PATITVR
COMMVNEM ILLVSARVM MENTIVM MOR
BVM, SVI PAVLISPER OBLITVS EST.

DE LEONTIASI.

H. Putas ne Marulle differre LEONTIASIM ab
Elephantiasi? M. Non puto, quin credo potius
Leontiasim appellatum esse talem morbum, quòd
Leonis in modũ frons corrugetur, & contrahatur.

DE LACTIS DEFECTV.

H. Vnde (rogo) Lactis defectus. M. à sicca mammil-
larum, totiusq; corporis intemperie. H. Quam nam
uictus rationem deposcunt, quæ lac non habent?
M. Humectantem, mediocriterq; calefacientem: nam
quæcunq; plusquam par sit, calfaciunt, & exiccant,
aut refrigerant, lac prohibent. H. Quid igitur ex-
hibebimus? M. Purum panem, Lac, Vitulinam car-
nem, Gallinarum, & Perdicum Pullos, hædos, Oua
sorbilia, Pisces saxatiles, Passulas, Amigdalas dul-
ces, Lactucas, Maluas, Buglossum, Melisophillon,
cucurbitas & eiusmodi.

DE MOLA.

H. Patiere ne (obsecro) postquam tam multa hætenus
edocuiſti, patiere ne me ignorare quid sit MOLA?
M. Non patiar, dicam itaque Molam esse tumorem
in uulvæ hostiolo, uel in uniuerso potius utero. Scri-
bit tamen Galenus esse informẽ carnem, quæ à gra-
uitate motus nomen sumpsit. H. Vnde nam fit? M.
à seminis muliebris, plurimiq; sanguinis mestrui re-
tentione, ac etiam à fluxu, quem moderatus calor
& cogit, & in carnis formam uertit. Talem sanẽ

morbis patientibus exhibendi sunt cibi boni succi. Confert multum etiam si præbeas unguentum ex Dialthea factum, necnon Emplastrum ex meliloto: proderit & subijcere uinum ex ruta confectum.

DE MENSIBVS SUPPRESSIS.

H. Vnde nam foeminis supprimuntur Menses? M. Aliquando à ualidis exercitijs, aliquando ab immoderata pinguedine, interdum etiam à nimia gracilitate. H. Suppressa menstrua quæ incommoda solent consequi? M. Totius corporis grauitas, nausea, horror inæqualis, dolor circum lumbos. Foemora, collum, & sinciput: adde etiam Febres ardentes & Urinas liuentes, non sine rubicunda sanie, atqui, si contegerit cohiberi menses à frigidis crassisq; humoribus, exhibere soleo cibos calidos, & extenuantes.

DE MENTAGRA.

H. Cogor adhuc tuis obstrepere auribus, orareq; ut explicare mihi libeat quid sit MENTAGRA. M. Est faciei morbus, qui à mento nomen mutuatus est. Occupat isq; sæpißime totum uultum (oculos tamen excipit) descendit etiam interdum in colla, in pectus, ac manus, eaq; membra fœdissimo furfure dehonestat. H. Differt ne Mentagra à Mentigine? M. Maxime: est enim Mentigo pecorum morbus. Manilius Cornutus Mētagra laborauit; ad cuius remedium perquirendum fertur ducenta sestertia liberalitate impendisse.

DE MELANTHEA.

H. Postquam uideo te in numero habere eam, ac definitionem cuiuscunq; morbi, cupio etiam scire quid

fit MELANTHEA. M. Tu mihi profectò tribuis
nimium: nihilominus ut tuum de mea doctrina iudi-
cium modereris ac etiam temperes, fatebor ingenue,
me nescire quid istuc morbi sit. Memini tamen legis-
se me apud Plutarcum in uita Phocionis, esse morbū,
quo Dimarcus Corinthius grauitè implicatus fue-
rit, morbi tamen naturā nō expressit doctus ille uir.

DE MENSIBVS REDVNDANTIBVS.

H. Vnde fit MENSIVM REDVNDATIO in mu-
lieribus? M. A' fractis, & apertis uasis. magna illa
sint, aut parua, non laboro. his ego soleo artus &
extrema corporis colligare uinculis, & cucurbitu-
las subter Mammillas affigere: authorq; sum, ut ci-
bo ac potu adstringente utatur, & assis potiusq;
elixis uestantur.

DE MELANCOLIA.

H. Quid est obsecro MELANCOLIA? M. Est men-
tis alienatio nulla adiuncta febre, fit autem quando
innocuo reliquo sanguine, tantum is qui in cerebro
continetur male afficitur.

DE NEPHRITIDE.

H. Quid esse putas NEPHRITIM? M. Renum mor-
bum, de quo forte Horatius intellexit cum inquit.

SI LATVS AVT RENES MORBO TEN-
TANTVR ACVTO. H. Credis ne inter acutos
morbos recensendam phremitum? M. Quid ni? an
non audisti Horatium Nephritim inter acutos nume-
rantem morbos?

DE NAUSEA.

H Cum non ignorem NAUSEAM esse stomachi fa-

stidium, ignoro tamen unde illa oboriatur? M. Non aliunde oritur, quàm à prauis humoribus circumstantibus, nec multum dissimilis est Anorexia, de qua pauloante breuiter differuimus. differamq; posthac fusius, si tibi uisum fuerit.

DE NARCE.

H. Quid (obsecro te) est NARCE? M. Est membri alicuius torpedio siue nimio labore, siue etiam immo dico frigore stupefcat, & Narco des is dicitur, qui eiusmodi ægritudinem patitur: traxit nomen à Narco Pisce eiusmodi malum inferente, qui & alio nomine Torpedo appellatur à Latinis.

DE ORIS FETORE.

H. Vnde molestus ORIS FETOR nasci solet? M. à putrescentibus gingiuis, à ciborum reliquis intra dentes detentis, & ab ipsa oris cutis calida intemperie, quæ sanè humiditatem immatam solet corrumpere. Sæpe etiam accidit ob corruptum humorem in ore uentriculi hærentem: fit etiam plerumq; oris, aut ipsius Pulmonis exulceratione. H. Sed quali uictu utetur is, cui anima fœtebit? M. Euitet in primis eos omnes cibos, qui facillime corrumpuntur. Veluti Lac, Pisces, fructus ferè omnes, medullas, æsculenta & uitiatas aquas, utetur assatis edulijs, potiusq; elixis, & fugiat eum somnum, qui statim à cibo solet nobis obrepere.

DE OZENIA.

H. Incidi olim in medicum quendam non obscuri nominis, qui iactitabat se nemini cedere in persananda OZENIA (non si ab inferis excitaretur Hippocra-

tes) ego tamen quid sit Ozenia planè ignoro ? M.
Tum Ozenia est , cum ulcera multa crustæq; quàm
plurimæ nares obsident , quæ non modo olfaciendi
uim frangant , sed odorem foetentem etiam exha-
lant. H. Magnum exemisti mihi scrupulū. M. Gau-
deo , si tibi quid feci , quod gratum extiterit .

D E O T A L G I A .

H. Heri profecto , cum familiarem quendam increpi-
tarem , quòd me de uia clamantem non exaudisset , fo-
resq; actutum non aperuisset , cepit se purgare quòd
Otalgia laboraret . ego uerò cum hanc uocem non sa-
tis intelligerem , animo ualde perturbato , & com-
moto ab eo discepsi . Dic tu (precor) quid sit ? M. Est
aurium morbus , nempe cum sonitus quidam intro
auditur non sine multa animi molestia .

D E O P H I A S I .

H. Quid est O P H I A S I s ? M. Praua quædam est affe-
ctio , quæ nondum latinum nomen consequi potuit ,
& capitis partem læsam in modum serpentis gla-
bram indicat : capilli tum sunt abradendi , & unguen-
to perungendum est caput , quod sane confici solet ,
cum euphorbio , Thapsia , utroq; Elleboro , semine
Nasturtij & erucæ , necnon cum Amigdalidis amaris ,
adde Sinapi , Oleum Nardinum , & Laurinum , ce-
ræq; tantum , quantum tu satis esse existimaueris .

D E P E R N I O N E .

H. Pridiæ , cum puerum meum cottidiani uictus admini-
strum obiurgarem , quòd à me in piscatorium forum
missus , tam serò reuertisset , ignosce (inquit) nam
Pernio calcaneis molestus esse non desinit : narra

*Celsus lib.
5. c. 33.
Egred. reg.
lib. 3. c. 19*

mihi igitur quid hoc morbi sit, ut sciam an illi sit ignoscendum, uel illius cessationem flagris puniendam? M. Moraus est pedum ex frigore proueniens, postremasq; pedis partes in primis lædens. H. Qui tolli potest? M. Plinius, (quem authore ego libentissime sequor) tradidit Rapo domestico (si feruens imponatur) sanari facile posse.

DE PHRENESES.

H. Si uera retulit quisquis mihi significauit in PHRENESESIM hoc anno incidisse quàm plurimos, fieri non potest ut de Phrenesi non plurimus etiam inter medicos nascatur sermo, itaq; ne nimis ignarus rudisq; uidear, doce quid sit Phrenesis. M. Faciam cum libenter, tum etiam diligenter. Est Phrenesis ægritudo mentem perturbans, & ad insaniam adigens, fit autem, cum quis inanes concipit imagines: non defuit Posidonius, qui scripserit tumorem esse membranarum circum caput, non sine acuta febre, à qua mens alienatur. H. Sed unde prouenit? M. Ex fluctuabile, uarieq; sese habet: nam si humida sit, somnos parit profundos, si uerò sicca, uigilias creat, si autem humida cum exiguo frigore admixto, stultitiam gignit.

DE PHTIRIASI.

H. Intelligebam superioribus diebus PHTIRIASI consumptos Pherecidem Philosophum, Syllam dictatorem, & alios multos: cumq; ego non satis intelligerem quid hoc esset, ualde sum mecum ipse commotus, cæpiq; ijs male præcari, qui magistri fuissent, quòd Græcorum literas (ut par erat) non edocuissent, tu

itaq; doce quid sit Phtisis. M. Est morbus pedicularis. Sed quid tu aliud scire optas? nunc certe non est otium prolixius agendi, alioqui semper causas notasq; morborum attulissem.

DE PITUITA.

H. Incidi (non diu est) in Ciceronis locum, ubi scriptum reliquit bonarum artium studiosos plerosq; omnes Pituitosos esse. qua re ut eum locum facilius intelligam, explana quid sit Pituita. M. Est capitis morbus, ex catarrho proueniens. Phlegma Græci appellant, nec dubitarim eam morborum omnium originem uocare, eorumq; (inquam) qui ex distillatione creantur. Hæc certe, siue intrò, siue extra sese prodant, uarios semper tumores, mordacesq; morbos parit. Meminit Horatius in Epistolis ad hunc modum scribens. PRÆCIPVE SANVS, NISI CVM PITUITA MOLESTA EST.

DE PLEVRITI.

H. Qualem morbum esse censes PLEVRITIM? M. Pleuritis est laterum morbus, quo morbo periit L. Crassus uir & eloquentia, & iuris prudentia maxime clarus: huiusq; morbi comites sæpe sunt Tussis, Febris, anhelitusq; difficultas. Huic tu facile succurres, si Oleum ex ruta aut Syropum ex Hiosopo diligenter exhibueris.

DE PODAGRA.

H. Posteaquam de tot morbis egisti mecum tam libenti, tamq; alacri animo, age etiam (obsecro) de reliquis, quo tibi obstrictior sim, nec prætermittas de PODAGRA loqui paucis (ut soles.) M. Podagra do-

lor est pedum: cuius quidem meminit Martialis cum
 ait. LITIGAT ET PODAGRA DIODORVS FLACCE LABORAT. Scribit Plinius
 hunc morbum rarò uisum in Italia Patrum Auo=
 rumq; nostrorum memoria, suaq; etiam ætate, non
 omnino curationi contumacem fuisse. ego quidem in
 multis sepe desijisse, in multis etiam sæpiissime pro=
 bè curatam animaduerti. Meminit Ouidius libro se=
 cundo de Ponto, Plinianæq; aduersatur sententiæ in
 hunc modum scribens. SOLVERE NODOSAM
 NESCIT MEDICINA PODAGRAM. Hæc si
 Genua contigerit ab Hippocrate Gonagra uocatur.
 Ptolomeus Philadelphus Rex Aegypti Podagræ
 obnoxius ualde fuit. addit Plinius uomica etiam labo=
 rasse, uulneratoq; pectore cū mortem in bello quæ=
 reret, medicinam inuenisse. Laborauit item Seruius
 Clodius Eques Romanus, cuius dolore coactus est ue=
 neno crura perungere, sicq; omni protinus sensu ca=
 rere. Podagricus item fuit Ennius Poeta celebris.
 Meminit Q. Serenus in hunc modum scribens. EN=
 NIVS IPSE PATER DVM POCVLA SIC=
 CAT INIQVA, HOC VITIO TALES
 FERTVR MERVISSE DOLORES.

DE PARIENDI DIFFICULTATE.

H. Vnde nam (rogo) difficilis partus? M. Sæpe Parien=
 tis uitio accidit, sæpe etiam foetus, aut secundarum
 culpa euenit: habeoq; diligenter adseruatam medi=
 camentum peregregium confectum Cinamomo ele=
 cto, Mirrha, Cassia lignea, succino albo uinoq;
 odorifero.

DE PORRIGINE.

H. Quid est PORRIGO? M. Genus est morbi, qui crescendo porrigitur, & protenditur, unde etiam nomen traxit, is innasci consuevit barbæ, capillo, & supercilijs. Lucilius sic de eo morbo scripsit: TRISTEM ET CORRUPTVM SCABIE ET PORRIGINE PLENUM.

DE PRIAPISMO.

H. Qualis morbus est PRIAPISMVS, dicito mihi ut hætenus consueuisti & breuiter & alacriter? M. morbus est, quo uirile membrum magnopere extenditur, nulla tamen adiuncta Veneris appetitione. Hoc morbo perculsus insignis Poeta diem suum superiore anno obiit. Sunt etiam qui credant eodem morbo extinctum esse Caninium Gorgagam uirum illustrem.

DE PVSTULA.

H. Age (precor) quid est PVSTULA? M. Est tuberculus in suprema cutis parte nascens, quamuis Plinius Pustulas Pituitæ eruptiones uocet. Non negarim ego tamen, quin Pustula etiam significet argenti Bracteam, cuius sanè rei fidem mihi abunde facit Martialis libro octauo, sic inquit. ET NIVEM FELIX PVSTULA VINCIT EBVR.

DE PTERYGIO.

H. Nihil ne de PTERYGIO mihi dicturus es? M. Quid mi? scito itaque Pterygium esse Membranulam neruis plenam sub oculorum angulis enatam, quæ aliquando sic excrescit, ut uniuersam pupillam contegat, quæ si in mediocritate tantum consistat, solis collirijs poteris ei opitulari.

DE PV

DE PVDENDORVM VLCERATIONE.

H. PVDENDORVM VLCERA citra inflammationem orta, quibusnam agent medicamentis? M. His nempe, quæ uehementer exiccant, ueluti sunt carta combusta, anetum ustum aridum, aloë arida in puluerem redacta, & radix Aristolochiæ rotundæ: attamē si vlcera humida sordidaq; fuerint, primū dilutiore mulso mox caprino lacte abstergēda fuerint.

DE PTILOSIS.

H. Quando (obsecro) fit PTILOSIS? M. Cum Pili supernæ palpebræ adglutinantur, uel cum occidunt, uel etiam cum ex palpebrarum crassitie conduplicato nascuntur ordine.

DE PSOROPHTALMIA.

H. Quid tu per PSOROPHTALMIAM intelligis (si quando in hanc uocem incidis?) M. Palpebrarum pruritū intelligo, nihil præterea aliud (quod sciam) cum uerò pupilla angustior, aut latior efficitur, sic ut obiecta ipsa maiora quàm re uera sint, appareant, Phtisis appellatur, idq; nominis forte habet is morbus, quod exulceratio pulmonis fiat, Pituita à capite plurimum distillante.

DE POLYPO.

H. Quid tu per POLYPVM intelligis? M. Narium morbum intelligo, sicq; appellatum existimo à Polypī animalis similitudine, nam ut Polypus uenatorem inuadit, sic & morbus hic nares ita aggreditur & occupat, ut & sermonem, & anhelitum impediat: sunt qui Polypum inter ea Carcinomata percenseant, quæ nullam curationem admittunt. Polyposi

D

Paul. 3. 627

uerò ij dicuntur, quorum nasus Polypo morbo offensus, in fœdam Portentosamq; magnitudinem auge-
scit, ob id coactus est scribere Martialis. NASUM
TVM VOLO, NOLO POLYPOSV.

DE PAROTIDIBVS.

H. Sunt ne PAROTIDES aurium morbi? M. Nemo est, qui de hoc ambigat. H. Vnde proficisci solent? M. Ex humoribus capitis, qui illò descendunt, congestiq; diutius resident, uisuntur & sæpe absq; ullo tumore: sunt qui existiment hoc morbo laborauisse M. Crassum quod surdasler haberetur, sicuti meminit Cic. in Tusculanicis quæstionibus.

DE PARVLIS.

H. Quid PARVLÆ? M. Quid gingiuarum tumor? cui nisi Pharmaco aliquo præstanti cito occurras, in Pus conuertitur, pernitiemq; affert maximam.

DE PARISTHMIA.

H. Narra etiam de PARISTHMIA. M. Narro, dicoq; esse morbum gutturi, faucibusq; maxime infensum: angusti enim gulæ meatus, aut potione immoderata, aut repentino haustu rei alicuius accidæ, præcluduntur.

DE PNEVMONIA.

H. Fac (quæso) ut tua etiam ope adiutus intelligam quid sit PNEVMONIA. M. Est morbus pulmonem sic lædens, ut etiam cogat aliquando intumescere. H. Vnde prouenit? M. Vel catarrho, uel ex Pleuritide.

DE PHIMOSI.

H. PHIMOSIM sæpe à chirurgicis nominari audio, non tamen satis adhuc intelligo quid sit: exime igitur

tur hunc scrupulum, ne mihi tanquam in salebra herendum perpetuò sit, quoties in hanc perobscuram uocem incidero. M. Phimosi est illud mentule uitium, quando nuda esse cogitur, uel semel conte=cta, nudari nullo modo potest.

DE PSORA.

H. De PSORA autem quid tu mihi narrabis? M. Nempe esse lepræ speciem in summa pelle uersantem, qua sanè quisquis laborat, pustulas, uel ulcera scalpere, nunquam non optat, & appetit.

DE PARALYSI.

H. Volo etiam (nisi graue ducas) scire ab ste, quid sit PARALYSIS, quibus ue modis in humano corpore deprehendatur. M. Est neruorum dissolutio, & uirium deliquium quoddam, quod deprehendi solet, cum recte non inceditur: atrahunturq; crura de more illorum, qui æditiora loca conscendunt, & in sinistrum quandoque dextra circumferunt quandoque è diuerso.

DE QVARTANA.

H. Vnde nam oritur QVARTANA? M. à solo atræ bilis humore putrescente oritur: suntq; Quartanarij omnes in ipso initio leniter ac moderate tractandi, nec ullo forti medicamento aut euacuatione irritandi, nisi forte sanguis magnopere exuperet.

DE RECLVIVO.

H. Sed quando (rogo te) sit RECLVIVVM? M. Quando circum unguis cutis sese soluit, nec dissimilis est Redinia, quam ferunt lana succida ex aqua frigida, facile solui posse.

D ij

DE RAMICE.

H. Cupio nunc scire qui nam hi sint, qui RAMICOSI meritò dicantur? M. Scias (uelim) Ramicem esse speciem hermiæ, & si uera narrat Plinius libro decimo, sanatur Syluestri ruta, cum axungia cōmixta; prodest etiam plurimum Ceratum ex nauali Pice, & mastiche Chia confectum, decetq; ægrotantes abstinere à flatuosis cibis, à largiore uini potu, & à uehemente corporis motu, ueluti à cursu, saltu, clamore, alijsq; id genus exercitamentis.

DE REGIO MORBO.

H. Dixisti (non diu est) Arquatum morbum non differre à REGIO, cupio nunc scire cur sit dictus Regius? an fortasse quòd eo affecti morbo, apparatu Regio, cultiore conclau, ludisq; & iocis sanantur? M. Ita est profectò, tu rem acu tetigisti, nihil est quod de hac re amplius dicam in præsentia.

DE STRANGVRIA.

H. Adhuc percuntari non desino, dic igitur quid sit STRANGVRIA? M. Est urinæ summa difficultas, quæ facit, ut guttatim eggeratur, quòd si mihi fidem non habes, eius rei testem legito Catonem de Re Rustica.

DE STROPHO.

H. Quid STROPHOS? M. Est intestinorum dolor.

DE SYCOSI.

H. Quid SYCOSIS? M. Est is morbus, qui aliter Ficus, aliter Marisca dici consuevit, sitq; is morbus cum caro nimis excrescit.

DE SYNANCHE.

H. Quid tu hic mihi asseris de SYNANCHE? M. Assero ego esse morbum, qui & spiritum, & fauces occupet stranguletq; . Demosthenes pecunia à Milesys corruptus cum flagitaretur ut orationem habere uellet, qua aduersariorum argumenta refellerentur, dixit se pati Synanchen, neque posse tria uerba proloqui. Tum quispiam, qui aderat (id quod res erat suspicatus) exclamauit non eum pati Synanchen, sed Argiranchen, quasi dixeris Argētanginam quo dicto aperte significauit emptum fuisse pecunia à Milesys Demosthenis silentium.

DE SYNCHISI.

H. Quid SYNCHISIS? M. Est oculi confusio, ob aliquam insignem plagam, ex qua perturbari ualde solet Pupilla.

DE SYMPISI.

H. Quid SYMPISIS? M. Puto esse tumorem palpebrarum.

DE SYNOCHO CVM PUTREDINE.

H. Quid etiam SYNOCHOS? M. Febris est, in qua una accessio ab initio ad finem usque perdurans in multos porrigitur dies: à Latinis hominibus continens dici potest, Synochorum autem tres sunt differentiae, sed hunc sermonem de Synocho in alium differamus diem: est enim prolixior quàm possit paucis absolui.

DE SYRIASI.

H. Cur non etiam motum mihi facis qualis morbus sit SYRIASIS, de ea enim frequentem mentionem

D i i j

Paul. lib. 1.
cap. 13.

intelligo fieri à medicis . M. Syriasis est puerilis
egritudo, quæ facit, ut inflāmentur capita, unde se=
quitur Syncipitis, & oculorum incuruitas, non sine
magno pallore ac multa corporis ariditate. Plinius
lib. x x i i. scriptum reliquit, Heliotropij folia in=
fantili fluxioni, quam Syriasm appellant, illita me=
deri posse .

DE SOLEROPHTALMIA.

H. Qualis morbus est SOLEROPHTALMIA?
M. Est is oculorum morbus, quando præduritie
uix aperiri possunt palpebræ, tumq; fiunt ocu=
li subruti ob sordes, quæ exiccata in oculis diu=
tius resident .

DE SPASMO.

H. Quem morbum esse censes SPASMVM? Vnde ue=
nascitur? M. Dicam quæ me legisse memini. Spas=
mus nascitur ex humore frigido, præsertim circa
musculorum Spinam . H. Quæ sunt morbi signa?
M. Si egrespiret, si exiguum arteriarum motum
habeat, si rubor in facie appareat, aut si oculi tumen=
tes sint, & si urina uel aquea, uel prorsus sanguinea
fuerit . H. Non peto ego ab ste unde nascatur, sed
quod sit Spasmus. M. Et illud eram dicturus modo
tantillum ocij relictum esset . Itaque nihil aliud est
Spasmus, quàm neruorum distentio, siue rigor è ni=
mia siccitate in euacuato corpore procedens. En ui=
des nunc me plus præstitisse, quàm tu poposcisti. M.
Ita factitare solent, qui tam liberali ingenio præ=
diti sunt, qualem te præditū nec dissimulanter agno=
sco, & ubique prædico .

D E S Y N T E X I .

H. Quid est SYNTAXIS? M. Est alui ægritudo, quando humoribus descendantibus nescio quid excreatur, flauæ bilis non dissimile. H. Vnde gignitur? M. à febre omnem internum humorem perurante. hoc, qui laborant morbo, Syntectici uocantur.

D E S T E R I L I T A T E .

H. Dic(amabo te)aliquid etiam de STERILITATE.

M. Dico libens, asseroq; nunc à fœmina, nunc à uiro solitam accidere, à uiro quidem, cum eius semen, uel torrefactum, uel frigidum, & aquosum nimis est: contingit etiam quàm sæpiissime nimia pinguedine: obesi enim adeò uentricosi euadunt, ut semen ad profundiores uteri partes iaculari non queant.

D E S C O T O M A .

H. Differamus paululum de SCOTOMA? M. Per me quidem liceat, nullum enim laborem tui gratia, ullo unquam tempore detrectabo: hunc sanè morbum uertiginem multi appellant: quod tenebræ tum ob oculos uoluantur. H. Vnde (quæso) procedit? M. Ex uaporibus multis ad cerebrum delatis. H. Quæ signa sunt obortæ ægitudinis? M. Oculorum hebetudo. Aurium sonitus, & semisurditas. H. Quando solent hæc euenire? M. Cum è lecto surgimus, somnoq; excitamur, uel cum ipsum corpus circumagitur, aut nimia ebrietate aut cibi immodica saturitate. Tum enim cucurbitulæ occipiti admotæ plurimum opis afferunt ad hunc morbum prorsus auerendum, & tollendum: prodest etiam anagallidis aut Cyslami succus in ipsas nares infusus.

D i i j

DE SATIRIASI.

H. Quid SATIRIASIS? M. Est elephantiasis species, quo morbo affecti, ulceribus scatere consueverunt: soliti etiam sunt tetrum habere conspectum, & os squalens non sine dolore & multa corporis inertia. adde, quod nullā cibi, aut potus uoluntatē persentiscant. sic autem dici puto, quòd ora Satyrorum Pictorum refferant, uel quòd libidinosi hominibus, quales sunt Satyri, id morbi euenire consueuerit.

DE SPHACELO.

H. Loquamur etiam de SPHACELO, postquam tantum otij relictum à grauioribus negotijs tibi esse intelligo, neque quisquam est qui nos interpellat.

M. Est morbi genus, quod immodice defatigatis solet accidere. Sunt qui existiment esse articulorum tormina: alij ossium tabem crediderunt, præsertim cum cernant aliquando usque adeo scabie corruptum esse aliquod membrum, ut absque ullo sensu prorsus maneat.

DE STRUMA.

H. Quid putas esse STRUMAM? M. Puto esse tumorem quendam, sub quo concretæ ex sanie, & sanguine quasi glandulæ quædam oboriuntur. H. Hæ quæ membra potissimum etiam inuadunt? M. Ceruicem, Alas, & ungues manuum.

DE SYNCOPIS.

H. Explana docte Magister quid sit SYNCOPIS? M. Explano lubenti animo, ac dico (authore Galeno) esse præcipitem quendam uirium lapsum, qui fit ob plurimam sanguinis & uentris inanitionem, nec

cellam habet generalem curandi rationem, excretionem, motum uehementem, dolorem ingentem & immoderatam.

DE SCIRRO.

H. Quid est SCIRRVs, de quo chirurgici tam sæpe loquuntur? M. Est prædurus quidam tumor insensilis, & qui uix curationem admittat.

DE SPVTO CRVENTO.

H. Vnde SPVTVM CRVENTVM? M. Fit quàm sæpißime ex externa causa: nempe delapsu ex eminentiore loco, aut si graue quidpiam Thoraci acciderit, quod uenas queat rumpere: fit etiam nonnunquam à frigore, magnaq; uociferatione quæ ut Hippocrates testatur, solet uenas frangere.

DE TREMORE.

H. Cupio scire quid TREMOR sit. M. Et ego cupio narrare tibi, qualis hic morbus sit, scito itaq; Tremorem duobus perfici motibus, uno quidem dum cogitur membrum ob morbi grauitatem ad inferiora labi, altero, dum sursum à facultate fertur, pendetq; eius origo à neruorum imbecillitate: eiusmodi agrotis consueui ego eam uictus rationem administrare, quæ causis aduersetur.

DE TABE.

H. Quid TABES? M. Est corporis extenuatio pulmonis exulcerationem consequens. H. Cur fit? M. Propter humoris acris, & erodentis defluxum in pulmonem. H. Qua ratione Tabidi qui sunt, agnoscipossunt? M. Corporis totius attenuatione. His etiam qui tabidi fiunt, nares acutæ euadunt. Tem-

pora collabuntur, oculi fiunt concaui: Spatulæq;
alarum instar prominent.

DE TERIOMATE.

H. Opto ualde scire, quid sit apud medicos TERIOMA.

M. Scito ulcus esse, quod pudēda maxime lædit: solet
etiam alias corporis partes ledere: nigraq; tum
efficitur caro atque corroditur, ater fit etiam san=
guis ac mali odoris euadit.

DE TORMINIBVS.

H. Explica (rogo) postquam hic tam multos habes
TORMINOSOS, unde dicantur Tormina? M. à tor=
quendo nomen sumpserunt, magno enim cum do=
loris sensu, & torquentur & exulcerantur intesti=
na: ex his etiam cruor solet emanare, frequensq;
dijciendi cupiditas, nec tum dolor abest ab ano:
mortale tamen signum est, si carnes egerantur.
Medici asserunt, non aliud esse Tormina, quàm cum
in anfractibus intestinorum mordetur aluus. Si ue=
rò Tormina accidant circa umbilicum, & lumbos
ipsos, inanis est quæcunq; adhibetur medicina.

DE TVSSIBVS.

H. Quid est TVSSIS? M. Est morbus arteriarum,
qui gignitur uel ex frigore, uel ex Pituita in pul=
mones delata: prouenit interdum ex uehementi uo=
cis conatu, & interdum etiam ex calore febris, quæ
si inueterata sit, difficile tollitur. H. Quomodo sa=
nari solet? M. Sanatur herba, quæ hanc ob causam
dicta est Tußilago: Dioscorides uerò tradidit ace=
tum sanare ueterem Tußim, sed prouocare & la=
cessere non iam. quod uerum sit, nec ne, nondum satis

compertum habeo, tamen certò scio sæpe Tusim na-
sci à crassis uiscidisq; humoribus, cui sanè Tussi ex-
hibere soleo Siropum ex Hisopo & Prassio.

DE TRICHIASI.

I. Quid est TRICHIASIS? M. Est eruptio pilo-
rum præter naturam ex reumate multo procedens.

DE TRACHOMATE.

H. Explica etiam quid sit TRACHOMA? M. Est pal-
pebrarum asperitas magna.

DE TONSILLIS.

H. Quod morbi genus TONSILLAS appellamus?
M. Morbum faucium, carne circa guttur indura-
ta. Scribit Plinius Tonsillas in homine appellari, in
sue uerò glandulas dici solitas.

DE TYMPANITE.

H. Quid est TYMPANITES? M. Est species Hydro-
piseos, qua qui est affectus, intumescit, ac in Tym-
pani modum inflari solitus est: quo morbo diu laborauit
Metrodorus Philosophus Epicuri socius.

DE VRINÆ DIFFICULTATE.

H. Cum de Diffuria loqueremur, fuisti tu quidem per-
parcus in agendo de ea corporis affectione, quæ mihi
sæpe incredibilem affert molestiam: obsecro te igitur
narra mihi paulo fusius, quæ tam strictim, &
tam paucis uerbis percurristi. M. Facio lubens quæ
tu imperas. Nasci quidem solet isthæc difficultas
ob Vesicæ imbecillitatem, frigidamq; intemperiem,
à qua ipsa læditur actio: curatur autem per ea quæ
calfaciunt, non itaq; inutile esset, si Pectinem cali-
dis oleis, nempe Rutaceo, Anethino, Liliaceo, Scor-

pionum, & ex Castoreo foueris. Præstaret etiam
ad mouere Fomenta, et Sacculos ex Camemelo, Abro
tano, Betonica, Artemisia, Ruta, Calamintha, Sabi
na, & similibus herbis confectos, nec alienum existi
mauero, si ægrotus in prædictarum herbarum deco
cto resederit. Ræliqua, quæ scire oportet, percun
ctare medicos quos habes urbe plurimos, & doctri
na & usu excellentes.

D E V E T E R N O .

H. Quid tu reris esse VETERNVM? M. Reor esse
morbum, qui somnum & marcorem quendam in ani
mum inuehat, idq; fit ex multo ocio & torpore ni
mio: ponitur tamen à Poetis quàm sæpius pro ipsa
pigritia ipsoq; somno.

D E V N G V E .

H. Qualis est hic morbus? & quam corporis partem so
let offendere? M. Oculos offendit, huncq; Græci Pte
rigium appellant.

D E V O M I C A .

H. Doce (precor) quid sit VOMICA? M. Tumor est
excreescens in corpore, qui saniem plerunq; solet eij
cere: Plautus tamen Poeta perfacetus, Vomicam,
Crumenam ipsam appellauit, quæ pecuniæ plena ac
referta sit. Maria Amadei Allobrogum Regis filia
diu Vomica laborauit, ob idq; nunquã Philippo Ma
rio Viscontio eius sponso congregi uoluit.

D E V E R M I N I B V S .

H. Postquam tam multa docuisti, doce etiam (obsecro)
quid sint VERMINA? M. Sunt dolores corporis,
qui exiguo quodam motu, & quibusdam ueluti sti

mulis, uermium instar, intestina pun gere consueue-
runt: Celsus meminit eius morbi, sicq; inquit.

NIHIL PERNITIOSIUS EST PVERIS
DVM VERMINANT: est autem uerminare uer-
mibus scatere.

DE VERRUCIS.

H. Neq; hoc latere me finito doctor excellens, quid sint
etiam VERRUCÆ? M. Sunt tumores uultum
obsidentes, quos Græci Mirmecias uocant. Festus
tamen Cossos appellat, qui serpere solent ad cerui-
cem usque, sæpeq; dolorem ac pruritum afferunt
quammaximum.

DE XEROPHTALMIA.

H. Dic etiam (precor) quid sit XEROPHTALMIA.
M. Dicam libenter: est pruritus oculorum, tracto
nomine ab ipsa siccitate, est enim arida quædam lip-
pitude, quæ facit ut nec tumeant oculi, nec fluant, sed
solum ingrauescant.

DE HIS, QUI COIRE

NON POSSUNT.

H. Docuisti tu & egregie quidem, qua ratione multos
grauis morbos possim depellere, doce nunc etiam,
quo modo quis re Venerea uti possit, si ob frigidam
intemperiem, aut aliud malum ea uti forte non
queat. M. Quisquis ille fuerit, infernas primum
partes exerceat, cibus uestatur calefacientibus, opti-
mumq; succum gignentibus. H. Qui nam (amabo te)
cibi illos decent? M. Hi nempe qui non solum belle
alunt, sed & flatuosi sunt. H. Recense (quæso) ci-
bos omnes, quibus uti solent qui mariti existunt, &

concurrere non possunt. M. Animaduerti ego eiusmodi homines crebro uti solitos carnibus Gallinarum, Perdicum, Caponum, Phasianorum, Iuuenum Columborum, Auicularum Montanearum, Passerum, Testiculis Gallorum ouis recentibus uino dulci & similibus.

H. Postquam morborum Catalogum alphabetico ordine satis diligenter recensuisti, doce etiam quare ratione morbis indantur nomina. M. Fiet quod ipse uoles, tibiq; (quoad uiuam) semper obsequi studebo. Induntur itaque nomina morbis, quandoque ab affecto membro; ut Pleuritis à latere, Peripneumonia à pulmone, quandoque etiam à causis, ut Maniæ ut Melancoliæ, quandoque à similitudine, ut Elephas, Leo Ictericus, Cancer, & Polypus, quandoque etiam ab ipsomet artifice, ut Chironium Vlcus, & quandoq; ab ijs, qui eo morbo laborarunt, Tylosis, & Herculani. H. Recte factum, quod hæc docueris, sed quorsum habes hic tot uasa totq; arculas repositas? M. Ut Vnguenta & Pharmaca quàm plurima adseruentur, quæ in primis ars nostra requirit. Hic enim (ut uides) recondo Elaterium, Crocinum, Malobatrū, & Mithridaticum. Hic uerò Atharim, Bottriona stomachicē, Opoticē & Panchrestum. H. Mira profecto narras, nec minorem uoluptatem sentirem, si de his uinguentis, & pharmacis aliquid narrares, quàm hætenus senserim, dum tam uaria morborum genera tanta facundia commemorares. M. Et in hac re, non me minus obsequentem, & morigerum habebis

quàm antea habueris. Para igitur te ad audiendum,
 ego ad loquendum paratus semper fuero, atque ab
 Elaterio exordiar. Est enim Elaterium (ut Plinius
 affirmat) medicamentum ualde efficax, quod fit ex
 cucumere Syluestri, succo è semine expresso. Cro-
 cinum autem species est unguenti, quod Croci pluri-
 ma commixtione conficitur. H. Est ne id Crocinum,
 de quo Propertius sic scribens, inquit. SIT MEN-
 SÆ RATIO VOXQVE INTER POCULA
 CVRRAT, ET CROCINO NARES MV-
 RHEVS VNGAT ONIX. M. Ita est, ut tu
 quidem arbitraris. H. Qua ratione confici solet.
 M. Ex Croco trito, & uino dulci. Hoc Romani
 non solum corpora ungebant, sed & Pulpita con-
 spargere assueuerant, quæ res eundem Poetam per-
 mouit, ut scriberet PVLPITA SOLENNES
 NON OLVERE CROCOS. In Cilicia primas
 laudes promeruit, mox Rhodi. Malobatrū un-
 guentum est iucundissimi odoris, quod afferri sole-
 bat ex Asiria: quo Romani solebant inungere ca-
 pillos, Vrinam prouocare, & oculorum Episoris,
 uino expressum, summa cum utilitate imponere,
 item sic eius Fronti qui somnum capere cuperet.
 Panchrestum genus est medicamenti, de quo Cicero
 Actione quarta in Verrem meminit. Atharis, medi-
 camentum est pueris ualde utile, quod fit Olyra her-
 ba decocta: Botryon est medicamentum confectum
 ex cinere excrementorum, quo Eschines Atheniensis
 (si uera refert Plin. lib. xxviii.) mederi cōsueuerat,
 & Anginis, & Tonsillis. Hic adseruo Enhamon:

Elaterium

crocinum

malobatrū

unguentum est enim à Græcis sic appellatum, mire
quidem appositum ad contrahenda Cicatricum uul=
nera. Opotice Dysentericis maxime prodest, pecto=
risq; uitij. H. Qua ratione confici solet. M. deco=
quantur mala Cotonea quinque cum suis seminibus
totidemq; punicis, & sorborum sextario, in congio
uini albi, lento igne. Hic est stomachice, medicamen=
tum credas utilissimū oris uitij, narium et aurium,
oculorum Caligini, Pterygijs, & Genitalibus. So=
leo etiam adseruare unguenta quàm plurima confe=
cta ex Floribus, quale est Rosaceum, Leucoium, &
Susinum: aut ex Folijis, ut Mirrhinum, Oenarithi=
num, aut ex radicibus, ut Nardinum, & Amarici=
num. Adseruo etiam uaria oleorum genera non ad
cutis nitorem, (ut pleriq; stulte faciunt) sed ad con=
firmandas corporis uires, & in primis Amigдали=
num, quo non solum emollio corpora, cutem eruga=
tam reddo, nitorem commendatiorem efficio, sed
& Varos cum melle de facie remoueo, auribusq;
ualde etiam prosum. Habeo Cicinum, quod ad uen=
trem purgandum exhiberi solet: Penes me etiam
plurimum est Laurini olei, quo soleo perungere Pa=
ralyticos, Spaticos, & Ischiadicos; non deest Bala=
ninum quo repurgo Varos, Furunculos, & Lenti=
gines. Non deest Omphacinum, quod ualde apposi=
tum est ad sudores cohibendos, confirmandasq; Gin=
giuas. Viden tu Amphoram illam? H. Video certe,
nec mihi tam parum prospiciunt oculi, ut uidere non
possim quæ uel Lippi facile cernerent. M. Ea est
Pleni Raphamini olei, quo Phtiriasis ab ægrotis
tello,

oleum amigda
linum

oleum

oleum

oleum

oleum

oleum

tollo . Viden tu illam aliam in reconditiorem loco
 sepositam ? H. Video sanè . M. Ea continet Se=
 faminum , quo dolores aurium sano , & ulcera
 quæ serpunt penitus tollo . Habeo penes me Balsa=
 minum contra Serpentes efficax . Habeo Lilinum
 Renibus utilissimum , sudoribusq; euocandis maxi=
 me aptum . Habeo Seleucinum neruis utilissimum :
 non deest oleum ex malis cidonijs expressum , quod
 copiosos sudores cohibere solet . H. Cogis me in
 stuporem uerti , Doctor excellens , dum tam admi=
 randa mihi commemoras . Nunquam profectò memi=
 ni me cum aliquo congressum esse , è cuius familiari
 sermone tam uberes perceperim Doctrinæ fructus
 atq; tecū loquens , hætenus percepi . iniecisti tu mihi
 tantam cupiditatem medicinæ scriptores euoluendi ,
 ut nihil nunc tam ardenter optem , sed unde nam tan=
 tum abstrusæ Doctrinæ percepisti ? indica (quæso)
 quos libros euolueris , ut si fortè in hæc studia ab=
 dere me uoluerò , scire possim qui sint à me impri=
 mis perlegendi authores . M. Hic tu facile uidere
 potes unde pusillam hanc morborum cognitionem
 hauserim . Ingredere Biliothecam meam . H. In=
 gredior , ò gratum , & iucundum spectaculum , sed
 sunt ne omnes hi libri ad medicinam spectantes ?
 M. Sunt ferè omnes . Hic ego habeo Acronis Agri=
 gentini libros . H. illum fortasse Acronem dicis , qui
 Athenis unà cum Empedocle tam docte philosopha=
 tus est ? M. Illum ipsum dico , qui Hippocrate An=
 tiquior fuit , ac de medicina omnium doctissime scri=
 psit . Habeo Aristogenem Thasium medicum excel=
 E

sas

lilium

seleucinum

Acro acri
gentinus Hippo-
crate anti-
quior

Asclepiades

lentem & qui floruit temporibus Antigoni Macedonice Regis. Hic est etiam Asclepiades Prusiensis Gn. Pompeij familiaris, qui rationem primus reperit quâ vinum ægris iucunde mederetur uno homine è funere relato, ac diuinitus quidem conseruato. H. Est ne is Asclepiades, qui dictitabat salutem constare, cibi, potusq; abstinentia: prætera gestatione, inambulatione, ac multa frictione: est ne is, qui ad Mithridatem tam audacter scripsit, quiq; extrema senectute è scalis lapsus mortem obiit est ne is qui tot lenocinia, totq; blanditias in ægrotorum gratiam excogitauit? M. Is est profecto, qui etiam Balneorum consuetudinem inuexit, primusq; lectulos pensiles commentus, quorum molli, iucundaq; iactatione obrepere posset ægrotis iucundissimus somnus. Hic sunt scripta Antonij Musæ qui Augusti medicus fuit. H. Is ne, de quo Horatius sic scribens meminit N A M M I H I B A I A S M V S A S V P E R V A C V A S A N T O N I V S. M. Is est, non absunt etiam longius volumina Artemonis medici. H. Is ne, qui Calua hominis interfecti, igneq; combusti, propinabat aquam è fonte noctu Comiciali morbum patientibus? M. Ille ipse est. M. Sunt etiam in hoc cubiculo, ubi tantam librorum struem cernis, scripta Agronis medici, qui peste Athenas passim deuastante affectorum, plerisque opem attulit maxime salutarem accensis ubique ignibus. Habeo Euphorbum medicum, qui Euforbie herbe nomen indidit lego, quàm sepiissime Eribotis libros, qui Oilei uulnus à Stym-

Euphorbus

phalidibus illatum persanauit . Lego assidue libros
 illius Erasistrati , qui tam belle depræhendit An-
 tiochi morbum , cum nouercam stratonicem misere
 deperiret . H. Est ne is , quem Plinius scripsit fuis-
 se Chrisippi discipulum . ex Aristotelis filia geni-
 tum ? cui Antiocho Rege sanato , centum talenta
 dono data sunt à Ptolomeo eius filio ? M. Is est.
 rarò etiam de manibus pono Epicarmum Coum Pi-
 thagoræ frequentissimum auditorem , quique de re-
 rum natura , ac medicina doctos conscripsit com-
 mentarios , frequens sum in lectione Democratis
 Seruiliij , qui herbam Hyberidam primus inuenit.
 Est mihi etiam ferè semper præ manibus Cherias
 Atheniensis , qui (ut testis est Plinius) Radicem
 Cardui ex aqua decocta , potatoribus stomachum
 corroborare , & uuluis plurimum conferre ut ma-
 res gignerentur , ante omnes tradidit . Lego etiam
 dies , & noctes , scripta Castoris medici . H. De
 hoc medico nusquam memini me legisse . M. Est is ,
 qui primus docuit Piperitim herbam , quam alij Si-
 liquastrum appellant , utiliter ebibi posse contra
 comitiale morbum . H. Nunc demum in memo-
 riam uenit , illum itaque esse puto qui primus scri-
 psit succum radices Ferularum , oculorum claritati
 plurimum conferre . Verso diu , uersoq; etiam no-
 etu libros Crinæ Massiliensis medici . H. Illius for-
 tasse Crinæ , qui ad syderum motus , ex Mathema-
 tica Ephimeride , Cibos ægrotis dabat , horarumq;
 momenta obseruabat , quiq; centum sestertia reli-
 quit muris Patriæ extruendis ? M. Illius certè , sed

Democratus

Castor

hic etiam habeo uolumen peregregium Cleophanti
medici, qui uini rationem illustrauit, quique ante
alios ostendit scemen Pastinacæ erraticæ dysenteri-
cis prodesse. H. O' te beatum, qui tibi tot præ-
clara subsidia ad Medicinæ studia comparasti. M.
Restant adhuc uisendi quàmplurimi celebres eius
artis scriptores. Ingrediamur igitur interius con-
claue, ubi multa inuenies uolumina Amythaonis,
Melampodis, Archagati, Apollodori, Scylei,
et Apollodori Tarentini. Restant uolumina At-
tali medici, Basilij Ancyрани, et Chrystoboli om-
nium doctissimi. H. Cuius nam Chrystoboli et M.
Eius(inquam) cui tam insignem peperit laudem sa-
gitta ex oculo Philippi Macedonis citra ulla oris
deformitatem euulsa: de hoc sanè uiro meminit Cur-
tius libro octauo de Gestis Alexandri Magni. Te-
ro assidue manibus Chrysermi scripta, eius dico
Chrysermi, qui Bulbi radice in uino decocta, pa-
rotidas curabat. Hausi etiã doctrinæ plurimum ex
doctissimis Dioclis, Dasy, et Glaucie scriptis. H.
Sed ubi sunt Galeni docta uolumina? M. An non
hic uides Galeni scripta, qui Traiani temporibus
floruit, quem Auicena, Cæteriꝑ; eius artis periti
medicorum Principem appellant? Propè Galenum,
adsunt Hermogenis medici scripta. H. Est ne ille
Hermogenes qui Adriano Imperatori cum se uellet
interficere, locum sub papilla circum scripsit, quo
letaliter percussus multo celerius spiraret? M. Il-
le est certè, quin etiam hic uides Lycum Napolita-
num, qui Attriplicem contra Cantharidas bibena

Chrystoboli

Chrysermi

Galeni

Lycus

dam censuit. Vides ne etiam Menecratis libros?

Menecratis

M. Video sanè, sed nescio quis hic fuerit. **M.** Is fuit qui nullam mercedem accipere consueuerat ab his, quibus suam nauaret operam: curabat in primis sacrum morbum, ea lege atque gratia, ut ab eo seruati, se Iouem appellarent, ipsiusq; Mancipia se esse faterentur. **H.** Est ne is qui eò Vesanix peruenit, ut ad Agesilaum Regem in hunc modum scribere ausus fuerit. Menecrates Iupiter Agesilao Regi salutem: quam insaniam ridens & stomacans Agesilaus, respondisse ferunt: Agesilaus Menecrati sanitatem. Profectò si uelim omnes percensere libros, qui in mea sunt potestate, quosque possum ad meum arbitrium legere, totum hunc diem recensendo, absumerem, itaq; finem loquedi hacde re faciam.

QVIBVS MORBIS, QVOVE

TEMPORE EXHIBENDÆ SVNT

PVRGANTES MEDICINÆ.

H. Istud etiam opto intelligere post tam multa à me diligenter perquisita quibus morbis, quòue tempore, purgantes medicinæ tuis exhibeantur ægrotis.

M. Nec hoc facere me posse negauero. Scito itaq; his purgatoria (ut ita dixerim) medicamenta non exhibere, qui uehementi correpti fuerint febre quoad Febris remissior facta non fuerit: sin uero illud facere quis recuset, saltem non citra quartum decimum diem exhibebit. Eorum enim calida caro, calidusq; uenter medicamentum retrahit, nihilq; æger purgari potest. Tum profectò febris ardentior efficitur, color permutatur, fitq; totus qui

*purgantes me
dicina quon
do commendant*

E iij

agrotat Auriginosus : etenim agitata bile minimeq;
detracta, neque bibere, neque exorbere potest, quin
potius auersatur omnia, & sepe misere interit.
Si uerò Medicina superior euadit, ante meridiem
nulla fit purgatio, à meridie uerò fit immoderata
quædam deiectio ac moritur : quod si superstes fue-
rit, unaq; cum purgatione febris remoueatur, fa-
cile conualefcit : quam ob rem purgantia medica-
menta in magnis febribus ore ne sumantur præcipi-
mus : quin potius si sit opus, do operam, ut per Cli-
stere injiciatur id multo tutius existimans : eadem
ratione æstiuo tēpore, post ipsius caniculæ exortum,
quingenta dierum spatio purgantem medicinam
non propino. Sed Clisterijs uti semper soleo.

M E D I C I N Æ L A U S .

H. Postquam incendiſti tu mihi animum ſenſus omnes
inflammasti ad medicine amplexanda studia, gra-
tum etiam mehercule feceris, si medicine laudes, ea
qua semper ſoles facundia prædicaueris. M. Quid
prædicem ego rem à tot præclaris ingenijs toties
prædicatam. H. Recte tu quidem dicis, eiusmodi
tamen medicina est, ut semper nouam quandam
laudum suarum materiem ingenijs (etiam parum
acutis) abunde suppeditet. M. Ego certe (ut inge-
nue fatear) ualde potius timeo, ne eximias eius ar-
tis dotes, summamq; amplitudinem quauis humana
conditione præstantiorem sordida mea possim ora-
tione complecti, præsertim cum mihi sint nulli
Rhetorum Fuci nullæq; amplificationum (ut ita di-
xerim) præstigiæ. H. Neque hisce rebus opus esse

iudico. Turpium enim est non pulcherrimarum rerum, ullis commendari lenocinijs. M. Sed quando ita tibi uidetur Rex (ut potero) aggrediar, & explicabo. Omnes ferè Artes summo semper ob id, in præcio fuere, quod uitæ humanæ commoda quàm plurima attulerint, qua in re, medicina, tanto mehercule excellentior cæteris artibus semper extitit, ut illius uel authores, uel inuentores pro Dijs habiti sint. De Apolline, & Aesculapio eius filio nihil ego meminero. Sunt enim hæc (ut aiunt) nota Lippis, & Tonsoribus: sed Asclepiadem testem aduocabo, quem Illyrici ueluti numen præstantissimum Herculi in honore adæquarunt. Nunquam profectò existimarunt ueteres posse ullum fideli & erudito medico satis dignum persolui præmiũ. Equidem cum animo nostro cogitamus quàm multiplex in humanis corporibus diuersitas existat, quotq; ex ætatibus, sexu, regionibus, educatione, ac studijs nascantur discrimina, medicinæ summam esse laudem quiuis facile intelliget. Etenim, si uitam alicui clarigiri proprium est Dei munus, datam saltem tueri, aut celeriter fugientem retinere, non ne Diuini hominis esse fatebimur? quanquam id quod nos solius Dei proprium esse credimus, medicos etiam olim factitasse in ueterum monumentis quam sæpißime legimus. Quot enim ipsius Aesculapij Medici ope, ab orco in lucem redierunt? Quot exanimati comploratiq; ab Rogo Domum solis medicorum præsi-
dijs, reuecti fuere? An non meminit Xanthus Historicus, Leonis Catulum occisum, hominemq; d

E iii)

Dracone iugulatum herba quam Halin uocitant,
uita mox redditum fuisse? non ne testis est etiam Iu-
ba, simplici herba, quendam in Africa extinctum
ad uitam fuisse statim reuocatum? Si quis uerò hac
de re dubitare uelit, dicat is mihi, an non fere idem
sit, mortuum r:stituere, & statim interiturum ser-
uare? an non tu hanc Artium præstantissimam fa-
cile credideris, quæ ingruentem mortem nullo la-
bore depellit, & quæ uitam subita ui oppressam,
reuocat? Quot (quæso te) ante supremum uitæ diem
sepulti fuere priusquam medicorum solertia mor-
borum uires, & diuinam præsidiorum uim depre-
hendisset? Quot etiam hominum milia & nunc qui-
dem uiuunt, recteque ualent, qui nec nati fortè & in
lucem suscepti fuissent, nisi hæc nostra Diuina Ars,
rectam obstetricandi rationem inuenisset nostræ: ita-
que arti uitam debere fateatur, qui nondum uitam
accepit, dum per eam retinentur Aborsus, dumque
fœminis excipiendi, continendique seminis uis confer-
tur, ac pariendi potestas elargitur: itaque Medi-
cus non solum iuuat, sed etiam ueluti Deus quisspiam
mirabiliter seruat. Quis itaque tam ingratus un-
quam fuerit, qui medicinam (post Deum optimum
Max.) Vitæ parentem, Tutricem, Seruatricem,
& uindicem non amet, non dilaudet, non ueneretur,
ac toto pectore non suspiciat? cuius præsidij nulli
non opus esse certò scimus, quod de alijs quidem
artibus non ita profectò euenit: nam illis, nec sem-
per, nec omnes egemus. Huius certe præcipua uti-
litate omnis mortalium uita constat. Fac enim tu

abesse morbos, fac omnes prospera ualitudine uti,
 qui poterit tamen illa omnia tueri, si Medicus ci-
 borum salutarium, ac nocentiam discrimen totiusq;
 uictus rationem non edocuerit! Graue quidem onus
 est ipsa senectus, & fortasse (ut inquit ille) Aethna
 multo grauius, Medicorum tamen opera, uel se-
 rius, uel multo leuior solet nobis contingere. Nemo
 certè fuerit etiā abstinentiæ tam pertinax suasor, ne
 mo etiam acrius suadebit ægroto Vitare Crapulam,
 temperate Venerem, moderari iræ, fugere tristi-
 tiam, & socordiam, atque ipse facit Medicus. Quis
 etiam efficacius suadet ægroto, ut si diutius optet ui-
 tam producere & maxime salutarem experiri me-
 dicinæ operam, ut prius animum à uitiorum colluue
 repurget? nemo etiam medico bilem atram melius
 cominuit, labefactatas cordis uires reficit, cerebri
 spiritus fulcit, & sustentat, mentis Organa per-
 purgat, ingenium expollit, memoriam recreat at-
 que in meliorem statum totum corporis habitum
 commutat. Quæso te, suauissime Hortensi, quisquis
 Freneticum, Lethargicū, Maniacum, Syderatū, aut
 Lymphatum restituit, non ne uniuersum restituit ho-
 minem? Curat quidem Theologus, ut homines resipi-
 scant, at Medicus efficit, ut ille præsto adsit qui pos-
 sit resipiscere, quid suadebit Letargico Theologus,
 si suadentem non audiat? Quid permouere poterit
 Phreneticum? Si Medicus atram bilem prius non re-
 purgauerit? Per multos certe homines calamitosa
 corporis temperatura etiam inuitos & reclamantes
 ad peccandum pertraxit. Animus quidem ui-

inter medicum
 & theologum
 ratio

det . Animus audit, uerum si oculos occupet Glau=
coma, & si aurium meatus crassus humor obsede=
rit nonne frustra uim suam exercet animus? O disse=
solet animus, & idem irasci consuevit, at uitiosus
humor mentis Organa obsidens in causa est, ut odio
aliquando prosequare, quem amore prosequendum
merito iudices: adde, ut etiam trascaris, cui fortas=
se non liceret irasci. Philosophiæ summam in hoc si=
tam existimauit Plato, si rationi parerent affectus
ad quam sanè rem, præcipuus adiutor solet esse me=
dicus, illud sedulo agens, ut ea pars hominis maxi=
me uigeat, sapiatq; cuius arbitrio, & potestate,
ea omnia geruntur quæ cum aliqua tui nominis lau=
de geri debent, sed cur tu iussisse reris Diuinas li=
teras medico suum deberi honorem, non solum ob
eam utilitatem, quæ inde provenire solet, sed etiam
ob multam necessitatem? Cogita mi Hortensi, si om=
nino cupis medicinæ (ut ita dicam) Diuinitatem in=
telligere, cogita (inquam) à quo nam hominum ge=
nere primum exulta fuerit, inuenies tu quidem il=
lam exercuisse Mosen, Orpheum, Homerum, Ma=
chaonem, Podalynum, & Peonem redigas tibi etiam
uelim in memoriam Christum ipsum, Disciplina=
rum omnium & principem, & certum authorem,
non Iureconsultum, non Rhetorem, non Philoso=
phum, sed medicum se esse aliquando professum.
Etenim de seipso loquens negat opus esse medico, ijs
qui recte ualent, adde quod uulneribus oleum, ac
uinum infuderit, & sputum terræ mixtum, cæci
oculos liniuerit, idem etiam hac una re, cum Orbi

medicorum, qui
exercuerunt

medicorum, qui

exercuerunt

ignotus esset, maxime commendari atque innotescere uoluit, seseq; in animos, & hominum affectus certis morborum remedijs insinuauit. Cogita Diuum Paulum Vini usum Timothæo tantopere adamato præscribentem ad corroborandam stomachi imbecillitatem. Cogita etiam Raphaelem Angelum, Tobiae cecitati egregie medentem, & tum diceres (sat scio) O Cælestem uereq; sacram disciplinam cuius præclaro cognomento Cælestes illas mentes insigniri minime puduit. Vides ne in illis locis, in quibus boni florent medici, in ijs non tam crebrò offendi qui sint Podagra contorti Paratyphi stupidi, aut qui ante tempus desipiant, atque ante senectam cæcutiant. Hortatus es tu me, quidem, ut Medendi artem plena manum, plenoq; ore dilaudarem, sed tanta est suauissime Hortensi ipsius argumenti ubertas, ut difficillimum iudicem, posse dicendi finem ullum inuenire. Etenim, si res permultas sola commendauit Antiquitas, hanc artem primam omnium reperit necessitas. Si scientiam ullam ullo unquam tempore Authores illustrarunt, huius inuentionem semper, Dijs attributam fuisse legimus. Si quam auctoritatem addere solitus est semel adeptus honos, non alia tam passim ac tam diu Diuinos honores promeruit. Si magni fiunt quæ summis probantur uiris, hæc summos Reges, hæc Satrapas, non solum delectauit, uerum etiam illustres effecit. Si quæ difficilia sunt, eadem & pulchra esse consueuerunt, nihil hac operosius, quæ tot disciplinis tantarumque rerum peruestigatione & usu constat. Si di-

ubi plures
sunt medici
plures ad
morbos.

gnitate, reni aestimamus, quid (obsecro) excellen-
tius, quàm ad Dei benignitatem tam proxime acce-
dere? Si facultate, quid potentius, aut efficacius,
quàm totum hominem certo exitio moriturum, pos-
se sibi quàm primum restituere? Si necessitate, quid
æq; necessarium, atque id, sine quo nec uiuere,
nec nasci etiam licet. Si uirtute, quid honorificen-
tius, quàm seruare genus humanum? Si utilitate,
nullius profectò usus, neque maior usquam esse con-
spicitur, nec latius unquam patuit. Si compendio,
aut hæc in primis frugifera sit oportet, aut in-
gratissimi sint mortales omnes necesse est. Itaque
tibi gratulor iucundissime Hortensi, quòd hæc præ-
clara studia tantopere ames, teq; maxime hortor,
ut ea toto pectore amplecti uelis, in eaq; neruis om-
nibus incumbas: quæ tibi decus, gloriam, authori-
tatem, et res magnas conciliatura sunt. Vale.

APOLOGIA MEDI-
 CINAЕ ADVERSUS EOS, QVI
 DE EA PARVVM HONORIFICE,
 ET SENTIVNT, ET
 LOQVNTVR.



VNT Nonnulli, (digni qui-
 dē, qui ex hominum numero ex
 turbentur) qui medicinam artem
 esse negant, propterea quod pri-
 scis temporibus nullo medicorum
 morbis solui, & implorato a uxilio ē grauiſſimis
 eripi ſoliti eſſemus, quod ego inficiari nullo modo
 auſim. Attamē fieri poteſt, ut medicinæ uberrimum
 quis percipiat fructum, medici nulla ūtens opera
 non ita tamen, ut quid in ea rectum exiſtat, aut non
 rectum non agnoſcat: nec ambigo, quin ita multi ſe-
 ipſos curare queant, ac ſi accerſitis medicis curaren-
 tur. Præclarum itaque iudicium hinc potius colli-
 gi poteſt, non ſolum Medicinam artem eſſe, ſed &
 Artium omnium præſantiſſimam, propterea quod
 funditus illam tollentes maleuoli homines, eius ta-
 men ope ſe ſeruari fatentur. Etenim neceſſe arbi-
 tror eos omnes, qui morbis impliciti ſunt, ac tan-
 dem priſtinæ ualeitudini reſtituuntur, eam ob rem

fuisse restitutos quod nonnulla omiserint quæ prius
factitarent, aut posthac fecerint, quæ facere non
consueuerant: necesse profectò est, aut inedia, aut
largiore cibo, aut siti, aut balneorum ope, aut Vigi=
lia, aut ocio, aut exercitio conualuissent qui ægroti
erant. Auxilium itaque dum percipit, uim præsi=
dij perspicue intelligit, sic & ex accepto damno,
rem fuisse aliquo modo nocentem persentiscat ne=
cessum est: nam quæ iuuandi, quæ ue lædendi uim
habent, non cuiusuis hominis arbitror esse digno=
scere. quapropter, si quid in ratione uictus per
quam sanus factus est æger, aut laudare, aut uitio
uertere uoluerit, omnia hæc ad Medicinam ipsam
spectare facile agnoscet, nec certe ullo modo ambi=
guum esse uideo, quin offensiones non minus quàm
adiumenta ipsa medicinam artem esse testantur
adiuuantia enim recte administrata iuuerunt, &
quæ suapte natura nocentia erant adhibita nocue=
runt. Quis igitur tam perfricta fronte erit ut ar=
tem esse neget ubi rectum & non rectum existat?
Illa nanque sunt quæ arte carent, in quibus nec re=
ctum nec quod non rectum est deprehenditur, aut
cum utrunque adesse perspicit, cur id non potius ar=
tis imperitiæ quàm artis ipsius operi non adscribit?

R E G I S T R V M.

A B C D E.

Omnes sunt Quaterni.



